

Mendenger ini perbilangan, So Hoa djadi amat terprandjat dan dengen soeara goegoep ia berkata :

„Akoe bersama iboe soeda menerima Siotjia saroema tangga ampoenja boedi besar, merasa soeker aken bisa membales, begimana lalah sekarang Siotjia boleh mengeloearken ini perkataän? Asal sadja bisa mendjadi bini moeda, itoelah soeda lebi dari tjoekoep!”

Selandjoetnja kedoea orang ini saling ber-tjakep dengen ketawa-ketawa penoe pengra-saan seneng dan goembira. Begitoelah ke-djadian Beng Tong telah pondong So Hoa doedoekin di pangkoeannja, sembari memoedji-moedji katanja :

„Paras Tji-tji jang begini tjantik, soeng-goe bikin semangatkoe seakan-akan terbang melajang !”

Dengen tangan kanannja So Hoa merang-koel orang poenja leher dan berkata sambil tertawa :

„Siotjia jang masih beroesia begini moeda, soeda bisa mempermaenken dirikoe begitoe roepa, itoelah heran sekali !”

„Beginama Tji-tji bisa oetjapken ini per-kataän, toch ini hari soeda dilangsoengken perkawinan,” kata Beng Tong, „dan siapa-kah tiada taoe kaoe ini ada akoepoenja

Hoedjin? Malahan sebentar lagi akoe tentoe  
masi maoe dapatken kesenengan dari dirimoe."

"Ha, ha, soeda doe kali akoe menika,"  
kata poela So Hoa dengen ketawa seneng,  
"tetapi semoea itoe kosong belaka! Soeng-  
goe bikin orang djadi merasa geli sendiri  
dalem hatinja."

"Tapi kaoe ternjata kliwat seraka," Beng Tong berkata, "mendapet soeami sematjem  
akoe jang boekan sadja beroman tjakep tapi  
djoega pinter, sedeng gadis - gadis seloeroe  
kota mengiri atas kaoepoenja peroentoengan  
bagoes, sebaliknya kaoe telah oetjapken ini  
perkataän jang mirip tjomelen, Sebetoelnja,  
apa lagi jang kaoe maoe tjari?"

"Hm!" berkata So Hoa, "kaoe toch me-  
laenken ada seroepa barang jang tjoema  
kena diliat tapi tiada bisa dimakan. Kaloe  
tadinja betoel-betoel ada Nio Siotjia sedjati,  
akoe koeatir besok pagi orang pasti bakal  
denger soeatoe tjerita jang amat rame!"

Lee Beng Tong lantas menoetoerken apa  
jang telah terjadi tadi siang, tentang begi-  
mana ajahnja sendiri poen soeda tiada brani  
akoehin dirinja, maka tiada heran kaloe So  
Hoa tadinja djoega masih bersangsi boeat  
lantas menetepken bener atawa palsoenja:

"Ja," berkata So Hoa, "Siotjia sekarang

sesoedanja dapetken maksoed hati, parasmoe keliatan semingkin berseri dan manis, boeat mana orang tiada bisa lantas kenalin begitoe gampang ”

Sehabisnya berkata, So Hoa laloe balikin badannja, merangkoel orang poenja leher dengen kedoea tangannja, kemoedian menggigit pelahan - pelahan Beng Tong poenja pipi kanan dengen giginja jang poeti bersi, sembari berbisik :

„Adoeh, Siotjia poenja paras jang begini tjantik, soenggoe bisa bikin orang djadi mati saking kerasnya menjinta !”

Begitoelah kemoedian ini kedoea nona eilok, laloe memboeka pakean loearnja masing - masing dan sama-sama naek ka pembaringan. Marika tidoer satoe bantel dalem keadaän brangkali lebi meresep dan lebi memoeasken daripada sebegimana penganten sedjati.

Esok paginja setelah bangoen tidoer, kedoea soeami-istri ini laloe sama tjoetji moeka dan Beng Tong lebi doeloe soeda rampoeng bersisir, tinggal So Hoa jang keliatan masih berias, sedeng Beng Tong doedoek di sampingnya sambil bantoe sisirken ramboet kapalanja So Hoa.

Boedak prempoean jang kebetoelan dateng

di sitoe, meliat ini keadaän lantas pergi rapportken pada Nio Siang soeami - istri, sembari katanja :

„Kho-ja di loteng lagi sisirin ramboetnja Siotjia.”

„Begimana ?” berkata Nio Siang pada Hoedjin sambil ketawa, „apa kliroe doega-ankoe, bahoea kitapoenja anak pasti aken bisa idoep roekoen dan saling menjinta dengan lakinja ?”

„Ja,” djawab Hoedjin djoega dengan sorot moeka kegirangan, „kaloe anak kita bisa idoep manis dengan soeaminja, kitaorang poen bakal bisa toeroet rasaken kesenengan di hari kemoedian.”

„Tiada antara lama, Lee Beng Tong dengan So Hoa keliatan soeda sama dateng di hadepannja itoe kedoea orang toea boeat membri hormat, soenggoe ini satoe pasangan ada tertampak begitoe soeroep dan begitoe manis, jang membikin Nio Siang dengan Keng Hoedjin tamba - tamba besar goem-biranja.

Demikianlah moelai itoe waktoe, Beng Tong bersama istrinja ternjata bisa berlakoe hormat dan berbakti pada kedoea orang toeanja, samentara terhadep pada orang-orang sebahawannja marika poen berlakoe

sabar dan moerah.

Adapoен pada hari kadoea dari harian nikahnja, koetika Beng Tong toeroen dari loteng dan baroe berdjalan bebrapa tindakan, keliatan Eng Hoat soeda dateng mapak, sembari menanja :

„Satoe malem boedakmoe tiada bisa tidoer seneng, kerna selaloe pikirin koeatir aken halnja Siotjia, taoelah begimana Nio Siotjia telah berlakoe terhadep Siotjia ?”

„Dengen akoenja roman begini roepa,” berkata Beng Tong. „tentoe sadja Nio Siotjia merasa seneng boekan maen, maka perloe apa moesti disangsiken.”

„Aken tetapi,” berkata lagi Eng Hoat. „Loja toch ada satoe lelaki palsoe jang tjoema mempoenjai nama tetapi tiada ada isinja, begimana Nio Siotjia bisa merasa seneng dan poeas.”

Beng Tong laloe bisikin pada Eng Hoat halnja So Jan Swat satoe persatoe, seraja memesen djoega aken si boedak kaloe ketemoe moeka dengen So Hoa, djangan sekali membangkit hal-hal jang soeda laloe.

Boekan maen girangnja Eng Hoat tempo soeda denger ini perkataän, agaknja seperti orang jang maoe berdjingkrak-djingkrak ia berkata :

„Satoe djodo dan satoe kebetoelan jang tiada terdoega, soenggoe perboeatan Allah teramat moedjidjad, sebaliknya poen sanget menggirangken !”

Selagi bitjara begitoe, sala satoe orangnya berdjalanan masoek dengen tangan memegang kaartjes - kaartjes nama, sambil merapport katanja :

„Semoea candidaat-candidaat examen jang baroe terloeloes pada dateng membri slamet dan lagi menoenggoe di loear.”

Lee Beng Tong lantas keloear menjamboet serta silahken itoe sekalian Tjin Soe masoek sampe ka pertengahan gedong, di mana orang disilahken doedoek minoem thee, atawa sesoeda bitjaraken sedikit hal-hal jang tiada penting, laloe pada berpamitan dan berlaloe dari sitoe.

Berselang brapa hari kemoedian, Go To Am ternjata soeda terpilih dan dibenoemd mendjadi assistent-resident dari afdeeling Go Koan, residentie So Tjioe Hoe provincie Kang Lam. Iapoenja soerat-soerat keangkatan dan laen-laennja semoea ada dioeroes sampe beres oleh Lee Beng Tong, bingga To Am sendiri ampir tiada poesing satoe apa.

Apabila semoea oeroesan soeda mendjadi beres, Go To Am lantas menetepken hari

baek boeat brangkat, lebi doeloe balik poe-lang ka desanja, aken kemoëdian bersama-sama iapoenja istri langsoeng menoedjoe ka Go Koan boeat memangkoe djabatannja. Lee Beng Tong poen telah menoelis sepoetjoek soerat, serahken pada To Am boeat disam-peken pada Khong Djia San. Dalem soerat mana selaen menanja kewarasannja itoe ke-doea orang toea, Beng Tong memoehoen djoega soepaja si ajah poengoet soeka me-nigirimken oewang ka kota radja, boeat membikin beres peritoengannja pada itoe Wangwee Ie Tie Boen. Lebi djaoe ia toelis, bahoea kapan ia soeda dapet pangkoe satoe pangkat tetep dalem golongan Han Lim dan mempoenjai kantoran sendiri, baroelah ia maoe oendang kedoea orang toea poengoetnya dateng pinda di kota radja aken sama-sama merasaken pengidoepan jang seneng dan moelia. Begitoe djoega berikoet soerat ter-seboet ia kirimken sepasang gelang Giok ketjil, berserta itoe sepasang kembang mas dari pengoerniaännja sri - baginda boeat dikasi pake pada sang ade, Goan Long, sem-bari poedijken soepaja itoe ade di hari blakang soeka bladjar dengen giat dan radjin.

Begitoelah pada hari jang telah ditetepken, Go To Am soeda brangkat keloear dari

kota radja dengen membawa iapoena semoea soerat-soerat jang penting. Samentara itoe Khong Djia San sekarang telah terpan-deng moelia di tempat kediamannja, tersebab iapoena anak poengoet soeda perolehken gelaran dalem tingkatan Han Lim, begitoe-poен ia sendiri ada mendjadi besan dari satoe Tjaij Siang, hingga semoea pembesar dalem kota pada basaken ia dengen panggilan Lo-thaij-ong dan bininja dengen seboetan Lo-thaij-thaij.

Adapoen Lee Beng Tong jang senantiasa toeroet bersidang di kraton, djika ketemoe hal apa sadja jang perlöe dibikin permoe-fakatan antara sri-baginda dengen sekalian mantri - mantri, Beng Tong selaloe soeka bitjara teroes - terang biarpoen terkadang ia moesti bertentangan pikiran dengen sri-djoendjoengannja. Teroetama dalem berbagi-bagi oeroesan negri jang roewet, Beng Tong atjapkali bisa membri pikiran dan voorstelan jang djitoe dan tjotjok dengen keadaännja hal. Lantaran ini, semingkin membikin Seng Tjong poenja seneng dan meresep pada ini satoe mantri moeda, jang ternjata boekan sadja mempoenjai ketadjeman otak jang loear biasa, tapi djoega brani bitjara teroes-terang dengen tiada taoe berlakoe poera-poera. Ia

semingkin hormatken dan hargaken sesoeatoe peroendingannja Lee Beng Tong, hingga djarang sekali perna menolak atawa tiada menoeroet apa jang divoorstelken olehnya. Sebaliknya Beng Tong poen tiada kerna itoe mendjadi kapala besar atawa tjongkak, malahan kaloe kedapetan di antara mantri-mantri dalem keradjaän ada berboeat kesalahan - kesalahan ketjil, Beng Tong selaloe soeka berlakoe sebagi penglindoengnja dengan goenaken iapoena ketjerdikan, ini sebab sebagian besar mantri civil maoepoen pembesar militair di keradjaän, kebanjakan bersoekoer dan merasa menanggoeng boedi pada Lee Beng Tong.

Terlebi-lebi Nio Siang poenja soekatjita, kerna mengetahoei Beng Tong soeka berlakoe djoedjoer dan toeloes hati, serta bisa bergaoelan setjara manis dan roekoen dengan semoea mantri-mantri ketjil-besar. Siapa sekarang soeda menika dengan poetrinja satoe boelan lebi dalem keadaän amat menjenengken.



Hatta, ditjeritaken Lauw Ke Pek ampoenia Boe - koe, Ko Hong Giap, selaen dari Ko Thaij Koen, djoega mempoenjai lagi

saorang ade prempoean, jang kawin pada orang berasal itoe tempat djoega, bernama Tjoei Soe Bian ; siapapoen ada dari keloe-aran Tjin Soe dan perna mendjabat pangkat Po Tjin dari bilangan Ouw Kong, tapi soeda lama meninggal doenia dengen tinggalin doeа orang poetra. Jang besar bernama Pan Liong, beroesia tigapoeloe taon, soeda terloeloes dalem gelaran Tjin Soe dari klas doeа, dari mana ia perolehken kebesaran sebagi satoe assistent - resident. Iapoenja poetra kadoea ada bernama Pan Hong, baroe beroesia delapanblas taon, penggawak-annja sedeng dan romannja tjakep, begitoe-poен pladjarannja bisa dibilang bagoes. Ber-adat sopan-santoen, perangi aloes dan tabeat pemoerah serta berhati sabar, hingga ia di-soekaï dan dihormatin oleh semoea orang jang kenal padanja. Sedari oemoer limablas taon ia telah toeroet dalem examen ketjil dengen berhasil. Beberapa taon doeloe, Pan Hong soeda dikasi bertoenangan pada sa-orang gadis familie Thio, tetapi di permoe-laän dari taon jang baroe liwat, sang toe-nangan lantaran seroepa penjakit jang tiada dapet diobatin telah meninggalken ini doenia jang fana, menjadi Pan Hong sekarang lagi ditjariken laen gadis jang sembabat boeat

djodonja.

Adalah pada soeatoe hari, Ko Hong Giap telah oendang Pan Hong bersama iboenja dateng barmaen - maen di gedongnya, serta menahan marika itoe menginep di roemanja, sedeng ia sendiri soeda kirim orang mewartaken ini hal pada Ko Thajj Koen, serta minta kapan Thajj Koen iseng - iseng soeka djoega dateng berkoendjoengan.

Adalah Ko Thajj Koen semandjek iapoe-nja poetra kadoea, Lauw Ke Pek, telah pergi ka kota radja, ampir selaloe merasaken kesepian dalem roema, baek djoega masih ada Dji Siotjia, Lauw Jan Giok, jang bisa berlakoe begitoe berbakti, hingga itoe orang toea dapetken djoega sedikit hiboeran dan pelahan - pelahan ia djadi maoe taro perhatian serta menjajang aken itoe anak prempoean tirinja. Maka koetika soeda trima oendangan dari Ko Hong Giap, lantas djoega ia memesen pada Kang Tjin Hie bersama iboenja soepaja toenggoeñ roema dengen baek, sedeng ia sendiri dengen membawa Jan Giok Siotjia laloe dateng ka gedong Ko Hoe, di mana disamboet sepantesnya oleh sekalian familie prempoean dalem gedong terseboet.

Tatkala manq, Lauw Jan Giok soeda ma-

soek oesia anemblas taon, parasnya semingkin keliatan tjantik dan bergoemirlang mirip kembang sedengnya megar. Boekan heran, kapan Tjoei Pan Hong boeat sesaat lamanja rasaken semangatnya seperti terbang mela-jang setelah satoe kali dapet pandeng itoe paras jang demikian molek; samentara dalem hatinya djadi berpikir dan berkata saorang diri :

„Baroe tiga taon tiada berdjoempa, tiada njana parasnja ini hari ada keliatan begitoe eilok, lagipoen dari mata dan alisnya ada mengoetaraken boedi-pekertinja jang baek dan boediman. Ja, ja, toch ada baek sekali kapan akoe minta Boetjin madjoeken lamaran atas dirinja ”

Sambil berpikir, Pan Hong selaloe tjari djalan boeat bisa memandeng paras orang sampe sepoeasnja, hingga membikin Jan Giok poen merasa itoe semoea dan mengarti bahoe iapoенja enko misanan ini tentoenja ada mengandoeng pikiran koerang baek bagi dirinja, maka itoe dalem hatinya poen djadi berpikir :

„Akoe toch soeda mengiket perdjandjian dengen Hong Hoe Siauw Hoa, maka sekalipoen Piauw Heng ada beroman tjakep dan pladjaran tjoekoep, serta roepanja taro hati

atas dirikoe, masakah akoe maoe melanggar itoe perdjandjian dan mendjadi satoe prempoean jang tiada setia. Soedalah sebrapa bisa akoe moesti singkirin diri djaoe - djaoe dari dia, soepaja bisa membikin koerang napsoenja."

Setelah berpikir begitoe, Jan Giok sengaja dengen bebrapa orang prempoean dari itoe gedong, masoek ka dalem kamar laen boeat doedoek beromong-omong. Sebaliknya Pan Hong begitoe dapet kesempatan diam-diam soeda toetoerken maksoed hatinja pada sang iboe, boeat lamarken Piauw Moaij menjadi istrinja.

Ternjata ini maksoed ada disetoedjoei oleh sang iboe, kerna begitoe mendenger anaknya oetaraken niatannja, ia poen djadi sanget bersoekatjita dan kemoedian lantas bitjaraken hal ini terlebi djaoe pada kedoea soedaranja, serta minta marika itoe aken soeka membantoe agar ini oeroesan bisa berhasil.

„Biarlah Siauw Te jang nanti mendjadi djomblang," kata Ko Hong Gie, „delapan-sembilan di antara sepoeloe bagian ini pengbarepan tentoe terkabobel."

„Aken tetapi," berkata Pan Hong, „djanganhah kita berlakoe kesoesoe, toenggoe sampe sesoedanja dahar siang, baroelah kita

liat kaloe - kaloe dapet koetika jang baek boeat lantas madjoeken ini pelamaran."

"Ja, itoe djoega betoel." kata Ko Hong Gie, „tetapi akoe aken lebi doeloe oendang dia keloeear dengen alesan boeat pertemoean familie; sesoeda meliat baek, baroe kemoe-dian kita madjoeken ini lamaran."

Itoe kedoea soedara Ko bersama Pan Hong serta iboenja, laloe pada dateng djoempaken Ko Thaij Koen, kemoedian sama-sama doedoek koempoel.

„Brapa taon tiada berdjoempa Dji Seng-lie," berkata iboenja Pan Hong pada Ko Thaij Koen, „tiada kira soeda begini besar dan mempoenjai ketjantikan loear biasa, soenggoe kita boleh merasa amat bersoe-koer."

Tjoei Pan Hong laloe toeroen ka halaman boeat menjingkirin diri.

„Ja," Ko Hong Gie tjampoer bitjara, „Siauw Te djoega jang sekean lama memangkoe djabatan negri di laen tempat, djarang sekali bisa ketemoe dengen Seng-lie, maka hareplah sekarang Seng-lie bisa di-oendang keloeear boeat bertemoe,"

„Itoelah ada sepantesnya," djawab Thaij Koen sembari prenta boedak prempoean pergi oendang Dji Siotjia dateng kemari.

Sang boedak jang trima ini prenta poen sigra berdjalanan masoek ka dalem boeat sampaiken itoe oendangan. Jan Giok mengarti bahoea ini tentoe ada satoe alamat koerang baek, maka ia djadi semingkin tiada brani keloeear, sang boedak prempoean kepaksa balik keloeear seraja merapport katanja:

„Roepanja Dji Siotjia merasa maloe boeat keloeear berdjoempa.”

Thaiij Koen lantas oendjoek sorot moeka tiada seneng dan berkata:

„Itoe anak mempoenjai banjak pola, masa sama familie sendiri boleh ada ini pengrasaan maloe. Hajo, kaoe boleh sigra masoek kombali dan bilang padanja, kaoe maoe dia moesti keloeear djoega.”

Sang boedak prempoean apabolehboeat lantas masoek lagi ka dalem, ketemoeken Jan Giok, serta toetoerken jang Thaiij Koen lagi goesar serta omongan apa jang telah dioetjapken.

Jan Giok kepaksa keloeear djoega dan dateng di itoe roeangan pertengahan, lebi doeloe ia membri hormat pada kedoea Boe-koenja, kemoedian pada iaooenja Ie dan iboe sendiri, baroelah mengambil tempat doedoek di samping. Boeat sedikit lama iboenja Pan Hong dengen Jan Giok saling membitjaraken

bebrapa soeal jang tiada terlaloe penting. sesoeda itoe, Jan Giok poen lantas berpamitan dan balik masoek ka dalem. Samentara Tjoei Pan Hong ternjata soeda bisa memandeng paras orang sampe sepoeasnja. diam-diam ia njataken poela pada iboenja iapoenja keinginan boeat bisa berdjodoan dengen itoe ade misanan.

Sebentar lagi, sesoeda orang dahar tengahari dan masih doedoek berkoempoelan, iboenja Pan Hong kedengeran moelai membilang:

„Anakkoe jang pertama soeda trima djabatan sebagai satoe Tie-koan, maka tiada lama lagi bersama bininja marika bakal pindah tinggal di tempat di mana ia melakoeken kewadjibannja. Anakkoe kadoea masih belon mempoenjai djodo, sedeng akoe telah beroesia tinggi, senantiasa akoe djadi berkoe-atir tiada ada orang jang mengeroes atawa menilik segala oeroesan roema tangga. Soekoerlah Dji Seng-lie, Jan Giok, mempoenjai paras dan beroesia ampir bersamaän dengan Pan Hong dan lagi masih belon berdjodo, akoe niat hendak minta pada Hian Moaij soeka djadiken ini perdjodoan, tetapi belon taoe begimanalah Hian Moaij ampoenja pikiran?“

„Djika Jan Giok bisa berdjodoan dengan

Pan Hong," menjampoer Ko Hong Gie, „itoelah bisa dibilang satoe perdjodoan jang amat sembabat, kerna jang lelaki pande sedeng jang prempoean poen tjantik. Siauw Te soeka mendjadi sebagi djomblangnya boeat berichtiar sampe terangkepnya ini perdjodoan."

„Ja, Tji-tji dan Hian Te, memanglah djoega ini hal ada sanget baek kaloe bisa ke-djadian," berkata Thaij Koen, „tetapi, Jan Giok boekan ada anakkoe sendiri, hingga akoe tiada bisa membri poetoesan, baeklah Hian Te menoelis sadja soerat ka kota ra-dja boeat minta pertimbangannya Kok Thio."

„Ini djoega betoel," berkata Hong Gie, „Siauw Te nanti menoelis sepoetjoek soerat, begitoepoen Dji Tji pasti djoega berboeat begitoe. Kok Thio toch soeda kenal baek Pan Hong poenja roepa dan kepandean, kebanjakan tentoe soeka mengaboelken serta trima ini lamaran."

Senabisnya oetjapken ini perkataän, ia lan-tas prenta orangnya ambil bawa dateng prabot toelis berikoet kertas. Begitoelah Thaij Koen dan Hong Gie masing-masing menoelis sepoetjoek soerat aken sampeken ini la-maran pada Lauw Tjiat.

Apabila itoe soerat - soerat soeda ditoelis beres dan ditoetoep rapi, Ko Hong Gie

lantas titah sala satoe orangnya jang biasa berpergian, boeat sigra brangkat ka kota radja aken sampeken itoe soerat-soerat pada Kok Thio.

Boekan maen girangnya Pan Hong meliat ini keadaän, sebaliknya, Jan Giok Siotjia jang dapet taoe hal terseboet dari boedak prem-poean, rasaken oeloe - atinja sakit seperti ditantjepin oleh riboean anak-pana. Ia pikir bahoea ajahnja tiada ada sebab hoeat menampik itoe lamaran.

„Maskipoen Tjoei Pan Hong ada bero-man tjakep dan mempoenjai kepandean bagoes,” katanya dalem hati, „tapi akoe toch tiada bisa melanggar pesenan iboekoe jang soeda marhoem atawa meloepaken itoe perdjandjian dengen Hong Hoe Siauw Hoa. Kaloe sadja kemoedian ternjata akoe dipaksa djoega moesti menika pada Piauw Heng, ja, tiada ada djalan lebi baek, selaennja men-roe itoe toeladan dari Beng Sie, menjegoer-ken diri dalem aer boeat mendjaga kesoe-tjiannja diri. Habis perkara !“

Kaloe bisa, ia maoe itoe saät djoega lantas bisa sampe di roemanja boeat perdame-ken ini hal pada Kang Sam So. Tetapi, sang maksoed tiada kesampean, oleh kerna Ko Thaij Koen roepanja beta berdiam dalem

roema soedaranja, inilah membikin gadis kita  
jadi tiada enak makan maoepoen tidoer.  
Ia tiada perna bergenembira dan sama sekali  
tiada bernapsoe dalem hal apa sadja.

Sampe pada hari kaämpat, baroelah Thaij  
Koen bawa Jan Giok poelang ka gedongaja  
sendiri. Di mana Kang Sam So keliatan ke-  
loear menjamboet serta bersama-sama ma-  
soek ka dalem. Samentara Thaij Koen balik  
ka kamarnja sendiri, adalah Jan Giok dengan  
diïkoetin oleh Sam So teroes naek ka loteng  
Siauw Hoen Kok.

Begitoe soeda berada di loteng, Jan Giok  
lantas tjari alesan aken si boedak Hwie  
Loan boleh pergi ka bawah loteng, baroelah  
dengan setjara kesoesoe ia membilang pada  
Sam So :

„Oh, Sam So, ketahoeilah bahoea akoe-  
poenja adjal bakal sampe !”

Kang Sam So jadi terprandjat koetika  
denger ini perbilangan kemoedian menanja  
sebab apa Jan Giok boleh keloearken ini  
oetjapan? Si gadis poen lantas menoetoer-  
ken satoe persatoe prihal lamarannja Tjoei  
Pan Hong, serta iapoенja iboe dan enkoe  
telah menoelis soerat ka kota radja.

„Kapan ajah soeda trima itoe soerat,”  
katanja lebi djaoe, „ampir bisa dipastiken

tentoe soeka mengaboelken. Begimana, Sam So, apa kaoe bisa tjariken daja boeat toe-loeng dirikoe?"

Kang Sam So tinggal terlekoer sedjoeroes lamanja, samentara dalem hati diam-diam menaksir seraja berkata saorang diri :

„Boeat sekarang akoe belon bisa pikir tipoe-daja begimana jang baek, sebaliknya Siotjia soeda ternjata ada satoe gadis jang berhati keras, boekan tiada bisa djadi jang dia nanti betoel-betoel mengambil poetoesan nekat. Maka itoe, tida-boleh-tida akoe haroes goenaken tjara boeat melambatken djalannja hal, memboedjoek dan menghiboer seberapa bisa padanja, agar soepaja dia dangan keboeroe mentjari mati. Kemoedian pelahan-pelahan baroe akoe pikir poela tjara begimana boeat memetjaken ini soeal."

Setelah berpikir, Kang Sam So lantas berkata dengan menarik napas :

„Oh, Siotjia, akoe harep kaoe tiada ambil kepastian sampe begitoe djaoe! Ingetlah, bahoea maskipoen bener Koe Loja soeda mengirim soerat ka kota radja boeat mela-mar, tapi toch belon tentoe Kok Thio bisa trima."

„Piauw Heng poenja roman dan kepan-dean, ajah sampe kenal baek sedari sekean

lama," berkata Jan Giok, „apalagi ini ada bersifat dari sanak menjadi sanak terlebi deket, maka moestail sekali kaloe itoe lamaran sampe tertolak."

„Tetapi, pepata doeloe ada bilang," kata Sam So lebi djaoe, „perkara djodo boekan ada satoe oeroesan sampiran. Dari itoe, bisa dipikir, bahoea boeat ini lamaran, tiada-lah begitoe gampang lantas bisa ketrimaan tjoema dengen satoe kali pembitjaraän. Apalagi taro kata, itoe lamaran ditrima, tiada oeroeng akoe toch masih bisa tjariken akal boeat keslametannja kaoepoenja kesoetjian diri!"

Mendenger ini pembitjaraän, Jan Giok baroe bisa rasaken hatinja sedikit lega, kemoe-dian membilang :

„Ja, apabila kaoe tida bisa berdaja boeat menoeloeng padakoe, melaenken kematian sadja jang nanti menjadi bagiankoe."

„Djangan koeatir," saoet poela Sam So „kapan ternjata keadaän betoel-betoel djadi kepepet, akoe tentoe sanggoep mengadaken tipoe jang tjoekoep sampoerna."

Sampe di sini, kita perloe balik menjoe-soel perdjalanannja itoe orang soeroean da-ri Ko Hong Gie dan boeat ringkesnja, kita

tjatet sadja bahoea itoe orang telah sampe di kota radja pada tanggal moeda dari boelan Dji-gwee. Dari sitoe langsoeng ia dateng ka gedong Kok Thio.

Djoestroe pada waktoe mana, Lauw Tjiat baroe sadja kira-kira tiga hari berselang, dapet trima kabar tentang iapoenja poetra, Lauw Ke Pek, soeda ditawan dan ditahan oleh kawanan brandal dari goenoeng Tjoei Taij San. Inilah menjebabken Lauw Tjiat ampir saben waktoe berada dalem keadaän doeka dan sedih, begitoepoen di koetika datengnya itoe orang soeroeau dari Hoen Lam. Lauw Tjiat kebetoelan lagi doedoek terme-noeng-menoeng saorang diri.

Begitoe mendapat rapportan dari penggalan pintoenja, sigra djoega ia prenta boleh jantas silahken itoe orang soeroeau masoek mengadep. Tempo soeda trima itoe soerat-soerat dari orang soeroeau terseboet serta boeka batja antero isinja, lantas ia menoelis doeä poetjoek soerat balesan. Soerat jang satoe ada boeat Ko Hong Gie, menjataken atas ditrimanja itoe lamaran; sedeng soerat jang laennja ada boeat Thaij Koen sendiri, dalem mana diperingetin boeat nikahken sang poetri.

Kemoedian itoe doeä poetjoek soerat ba-

lesan laloe diserahkan pada soeroean tersebut, jang sesoedanja menginep satoe malem langsoeng brangkat poelang dan ia sampe di Koen Beng Koan pada pertengahan boelan Sie-gwee. Di mana, lebi doeloe ia ketemoeken Ko Hong Gie serahkan soeratnya, sesoeda itoe teroes dateng ka gedong Kok Thio aken sampeken soerat jang laennja.

Sjahdan di itoe satoe hari, Jan Giok Siotjia djoestroe ada lagi berdoedoek dengen Thaiij Koen di roeangan pertengahan blakang, membitjaraken berbagi soeal jang berhoeboeng dengen oeroesan roema tangga, tiba-tiba saorang boedak prempoean keliatan telah masoek merapport, katanja :

„Di loear sekarang ada lagi menoenggoe itoe orang soeroean dari Ko Hoe, jang baroe sadja poelang dari kota radja, dengen membawa soerat balesan dari Kok Thio ingin berdjoempa Thaiij Koen.”

„Baeklah,” djawab Thaiij Koen, „akoe aken sigra pergi ketemoeken padanja.”

Berbareng dengen oetjapken ini perkataän, Thaiij Koen lantas bangoen dari tempat doedoeknya, serta bertindak menoedjoe ka loear, samentara Jan Giok jang pikir bahoea iapoenja mati dan idoep, meloeloe ada bergantoeng dengen itoe sepoetjoek soerat ba-

lesan, maka sigra djoega ia toeroet bangoen dan ikoetin Thaj Koen dari blakang boeat menoedjoe ka loear.

Dalem begitoe, tiada njana Thaj Koen mendadak terkenang pada kedjadian jang soeda - soeda, dengen soeara panasaran ia laloe berkata pada Jan Giok :

„Lantaran berhoeboeng dengen sendiri poenja perdjodoan, keliatannja kaoepoena perhatian boeat ini ada begitoe besar, ternjata dengen kaoepoena begitoe perloe boeat bisa lekas mendenger kabar. Sebaliknja kaoe tiada inget, kaoe soeda bawa kaoepoena Dji-so dateng ka loteng blakang boeat tje-goerken diri dalem aer. Hm, apa ini tiada keterlaloean !”

Mendenger ini oetjapan, selebar moekanja gadis kita berbajang warna mera saking maloenja. Ia brenti bertindak dan tiada brani mengikoet teroes, sedeng Thaj Koen soeda berdjalan keloeär dan berdoedoek di roeanan pertengahan loear, baroelah dengen ati-ati Jan Giok dateng djoega di blakang Pian boeat mengintip serta pasang koeping aken dengerin apa-apa.

Koetika orang soeda anterken dan hatoerken di hadepannja itoe soerat balesan, Thaj Koen sigra boeka dan batja, maka pertama-

tama sesoeda membatja bebrapa barisan kedengeran Thajj Koen poenja soeara tertawa jang dibarengin dengen perbilangannya:

„Dari sanak mengiket sanak terlebi rapet, memanglah ada bagoes sekali, tiada oeroeng ini perdjodoan moesti kesampean djoega.”

Sekalipoen begimana gemoeroeh soearanja goentoer, brangkali Jan Giok tiada aken djadi begitoe kaget seperti waktoe mendenger ini perbilangan. Saat itoe djoega gadis kita rasaken semangatnya seperti terbang melajang, dengen sempojongan langsoeng ia berdjalanan masoek ka dalem.

Samentara itoe, Thajj Koen teroesken membatja soerat terseboet, baroelah ia mengetahoei bahoea Ke Pek lantaran minta madjoe di medan perang, achirnya soeda djato dalem tangannya kawanan brandal Tjoei Taij San sebagai orang tawanan, mati dan idoep masih belon ketaoean. . . . .

Thajj Koen dengerken satoe soeara djeritan, berbareng badannja djato di atas lante dan pangsan.

Sala satoe boedak prempoean boeroe-boeroe lari masoek ka dalem, sembari mendjerit-djerit katanja :

„Thajj Koen lagi djato klengar di djoebin . . . , . . . Harep Siotjia soeka lekas

keloear menoeloeng. . . . .”

Tatkala itoe, Jan Giok sedeng berdjalan masoek dengen niatan hendak tjari Kang Sam So boeat minta pikirannja tentang soeal apa jang baroesan ia denger. Sekoenjoeng-koenjoeng dengen kaget ia dapet denger djeritannja itoe boedak, maka boeroe-boeroe ia sigra balik keloear dan bersama laen-laen boedak prempoean marika angkatin Thaij Koen kasi doedoek poela di atas korsi. Sa-mentara Jan Giok laloe ambil itoe soerat dan batja, baroelah ia dapet taoe sang enko telah djato dalem tangannja kawanan bran-dal, maka ia djoega tetoeroetan merasa sedih.

Sesaät kemoedian, Thaij Koen keliatan sijoeman poela dan berbareng kedengeran ia lepaskan soeara tangisan keras, sambil membilang mirip ratapan :

„Oh, kesian amat anakkoe! . . . . Begimana ia bisa sanggoep menahan itoe kesengsaraän serta siksaän dalem sarangnja kawanan begal jang boeas? . . . . Allah, antjoer - remoek rasanja hatikoe! Toeloeng dan lindoenginlah anakkoe. . . . .”

---

### XXXI.

Minggat ka gredja, Jan Giok mempertahanken kesoetjian. Memereksa hal pelarian, Thaij Koen merangket boedak.

---

Sekombalinja di dalem kamar tidoer, Thaij Koen tinggal berbaring di atas pembarangan sembari menangis tiada brenti-brentinja.

Dalem keadaän begitoe. Kang Sam So laloe mengadjar pada Jan Giok, katanja:

„Selagi sekarang Thaij Koen sedeng bersedih dan tangisin poetra, bolehlah Siotjia poera-poera berlakoe radjin dan soenggoe-soenggoe meladenin Thaij Koen, dengen begitoe tentoe Thaij Koen tiada tega nikahken Siotjia terlaloe kesoesoe.”

„Toch sedari doeloe akoe merasa bahoea akoe selaloe lakoeken setjoekoepnja kewadibinan sebagai anak orang,” kata Jan Giok, „tjoemalah di pemandengan satoe iboe tiri sedikitnja tentoe ada perbedaan.”

Kendati soeda oetjapken ini perkataän, toch Jan Giok traoeroeng soeda menoeroet djoega adjarannja Kang Sam So, jalah saben waktoe ampir tiada perna berlaloe dari depan pembaringannja Thaij Koen, memboedjoek dan mengiboer dengen berbagi - bagi tjara,

soepaja itoe orang toea poenja kedoekaän bisa mendjadi koerangan.

Koetika sampe pada besokannja, dengen masi berada di atas pembaringan, Thaij Koen membilang pada Jan Giok :

„Ajahmoe telah menetepken kaoepoenja perdjodoan pada Tjoei Pan Hong, sedeng hatikoe ini waktoe ada sedeng koesoet, hingga tiada mempoenjai kesempatan boeat menjediaken barang - barang pandjeran, maka biarlah diatoer sadja itoe barang - barang bekas pandjeran doeloe hari jang mendjadi bagiannya kaoepoenja enko, boeat kaoe boleh bawa pergi kapan dateng tempo menika, blakang hari pelahan-pelahan baroe kita atoer dan sedia lagi sampe setjoekoepnja.”

Berbareng oetjapken ini perbilangan Thaij Koen dengerken djoega soeara sesoenggoek-annja. Samentara Jan Giok Siotjia dengen sangat soeda menampik sembari katanja :

„Oh, Boetjin, Toako soeami-istri ini tempo lagi berada di tempat djaoe. sedeng Djikò masi terkoeroeng dalem sarangnya kawanan brandal, maka kaloe anak lantas keloear menika dengen mendadak, nistjalah Boetjin bakal tinggal sendirian dan kesepian dalem roema, inilah tentoe bakal menambahken Boetjin ampoenja kedoekaän.

Sebaliknya djika anak perloe djoega moesti menika, biarlah toenggoe sampe Toaso soeda poelang di sini, baroelah anak bisa tinggal-ken ini roema dengen hati lega."

"Ach, njatalah anakkoe ada amat berbakti," achiRNAja berkata Thaïj Koen dengen pengrasaän terharoe, "kaloe bisa begitoe, memang ada baek sekali."

Jan Giok diam-diam merasa girang dalem hati, ia semingkin berlakoe ati-ati dan jakin meladenin serta merawat Thaïj Koen.

Sampe pada hari katiganja sesoeda dahar pagi, saorang boedak prempoean keliatan telah masoek merapport:

"Dji-koe Loja ada dateng kemari hendak berdjoempa!"

"Silahkanlah dia masoek di sini," memerinta Thaïj Koen, sedeng Jan Giok sigra djoega berlaloe keloeär dari kamar itoe.

Sekoetika lamanja, Ko Hong Gie soeda berada dalem kamar dan Thaïj Koen dengen berdoedoek di atas pembarangan, prenta boedakna tarik satoe korsi deket pembarangan serta silahken itoe Koe Loja berdoedoek.

Sesoeda orang minoem setjangkir thee, Ko Thaïj Koen kedengeran moelai berkata:

"Ke Pek jang koerang pikir dan tjoema mengandel sadja atas kebraniannja hati,

soeda madjoeken diri sendiri boeat keloear perang, hingga kena ditawan oleh kawanan brandal, soenggoe bikin hatikoe boekan maen bingoengnja."

„Maskipoen Ke Pek boeat samentara ada mendjadi orang tawanan dari kawanan begal itoe," berkata Hong Gie sambil memboedjoek, „tapi Tji-hoe tentoe bisa beriehtiar, hingga tiada lama lagi Ke Pek pasti bisa poelang sendiri, inilah kita boleh traoesa terlaloe berkoeatir."

■ Kemoedian sesoedanja bitjaraken poelaen - laen soeal jang tida berkepentingan, Hong Gie berkata lagi:

„Tji-hoe poenja soerat balesan soeda menetepken Seng-lie ampoenja perdjodoan, kiranja bisa lantas dipili hari baek boeat melangsoengken ini perkawinan."

Sekoenoeng - koenoeng Thaij Koen mendjadi morka dan berkata dengen soeara aseran :

„Ternjata Tji-tji tiada mempoenjai Liangsim, soeda taoe jang akoe ini waktoe sedeng hadepin seroepa mara - bahaja, boekannja toeroet berdoeka, malahan ada begitoe tega bitjaraken hal perdjodoan zonder menoenggoe tempo. Begitoe djoega kaoe, sebagai satoe soedara sama sekali soeda tiada mem-

poenjai pertimbangan, lebi dojong ka fihak sana daripada akoe di sini."

Sehabisnya berkata begitoe, dengen tangan wemoekoel-moekoel pembaringan, Thaj Koen berkata lagi dengen treakan keras:

„Roepanja kaoeorang hendak mendesek sampe akoe hadepin kematian ! Kedjem ter-laloe !”

Didamprat begitoe roepa, Hong Gie djadi merasa amat maloe, apabolehboeat ia menjaoet djoega :

„Djikaloe Tji-tji ada beranggepan begitoe roepa, ja, soedalah, kitaorang toch tiada sengadja maoe mendesek, maka djanganlah Tji-tji mendjadi begitoe morka.”

Achirnja setelah bitjaraken lagi laen-laen hal boeat sedikit lama, Hong Gie lantas berpamitan dan balik poelang ka gedongnya sendiri. Samentara itoe Jan Giok jang memang ada perhatiken betoel orang poenja sesoeatoe pertjakepan, itoe waktoe diam-diam djadi merasa amat girang dan bersoekoer tiada terkata.

Berselang ampat - lima hari kemoedian, Thaj Koen soeda bangoen dari pembaringan dan moelai bisa mengoeroes oeroesan dalem roema. Tiba - tiba orang merapport Tjoei Hoedjin dateng berkoendjoengan. Thaj Koen

laloe keloeear menjamboet dan silahken ma-soek ka dalem, serta sama berdoedoek di roeangan blakang, di mana lebi doeloe orang saling bertjakepan ka timoer dan ka barat, baroe kemoedian kedengeran iboenja Pan Hong berkata :

„Dalem ini satoe boelan, Pan Liong aken membawa pinda istrinja boeat tinggal bersama-sama di tempat perkerdjaännja, sedeng Pan Hong tiada lama poen moesti pergi ka kota radja boeat bersedia aken toeroet dalem examen di laen taon, samentara akoe sendiri telah beroesia toea, di roema tiada ada poela laen-laen orang jang boleh diboeat andelan, djikaloe Dji Tit-lie bisa tjepe dateng temenin akoe, soenggoe akoe bakal merasa sanget bersoekoer.”

„Itoe hari Hian Te dateng bitjara, djoestroe akoe lagi dalem pikiran koesoet hingga tiada ada napsoe boeat mengatoer ini-itoe,” berkata Thajj Koen.

„Sebaliknja sekarang,” kata lagi iboenja Pan Hong, „tentoealah soeda tiada ada halangannja poela.”

„Baeklah,” kata Thajj Koen, „akoe melaken menoeroet Tji-tji poenja maoe.”

Tjoëi Hoedjin djadi amat girang, sebaliknja Jan Giok jang mentjoeri denger orang

poenja bitjara soeda djadi begitoe terprandjat seakan akan soekmanja seperti soeda tinggalken badannja, kemoedian boeroe-boeroe ia dateng ka loteng blakang, ketemoeken Kang Sam So serta tjeritaken apa jang ia soeda denger dan minta Sam So soeka lantas tjariken akal boeat menoeloeng padanja.

„Djanganlah Siotjia terlaloe keboeroe napsoe.” Sam So kepaksa membri hiboeran, „akoe tentoe nanti adaken djalan jang baek boeat kaoe.”

Tiada antara lama, Tjoei Hoedjin soeda berpamitan poelang.

Dan tiga hari berselang di waktoe s'ang, Ko Hong Gie telah dateng poela di gedong Kok Thio, ketemoeken Thaij Koen sembari mengasi taoe bahoea familie Tjoei soeda menetepken tanggal Sie-gwee Tjap-pek bakal dilakoeken pengantaran pandjer, sedeng tanggal Dji-go adalah hari kawinnja. Lebi djaoe diandjoerken soepaja segala apa biarlah atoer sebrapa bisa sederhana, djangan terlaloe direpotin kerna ini perkawinan toch ada antara sanak dengen sanak.

Thaij Koen sama sekali tiada njataken kebratan boeat itoe penetapan, samentara Hong Gie poen laloe berpamitan poelang.

Apabila Jan Giok mendapat taoe ini hal,

zonder berajal lagi sigra djoega ia dateng berdame pada Kang Sam So katanja :

„Lima hari lagi aken lantas dilangsoeng-ken antar pandjer, begimana sekarang kaoe-poenja tipoe, Sam So ?”

„Akoe toch ada saorang goblok, begimana bisa poenja akal bagoes boeat digoena-ken,” djawab Sam So dengan kebingoengan, „tetapi biarlah pelahan - pelahan kita tjoba pikir lebi djaoe.”

„Inilah tjoema ada akalan melambatken madjoenja balatentara,” berkata Jan Giok dengan soeara piloe, „ja, soedalah tiada ada lagi laen djalan daripada mati boeat membelah nama kehormatan.”

Kang Sam So kerna sanget berkoeatir sang nona betoel-betoel nanti membinasaken diri sendiri, maka ia laloe berkata :

„Ada satoe akal jang akoe soeda pikir sedari bebrapa hari berselang, tjoemalah di-slempang Siotjia nanti tiada koeat menanggoeng roepa-roepa kesengsaraän.”

„Sebetoeijnja akal apakah itoe ?”

„Akoe ada poenja saorang ade prempoean, dalem oesia toedjoebias taon telah menika pada orang she Thio, tetapi soeaminja telah mati baroe sadja menika brapa taon ; lan-taran mana adekoe poenja hati djadi pata,

Ialoe kemoedian dia masoek ka dalem gredja Ban Jan Am mendjadi padri dengen memake nama Hoan Djoe. Diapoenna goeroe ata-wa ketoea dari gredja itoe ada bernama Sian Leng, soeda beroemoer ampatpoeloe taon; selaen itoe masih ada lagi ampat orang padri prempoean laen. Letaknya Ban Jan Am ada kira-kira berantaraän doeablas paal lebi dari sini. Maka kaloe Siotjia soeka kita-orang boleh pergi menoempang dan menjingkirin diri dalem itoe gredja, sedeng di sitoe djoega ada mempoenjai banjak kamar kosong. Tetapi, setaoelah begimana Siotjia poenja pikiran ?“

„Sam So poenja bitjara ternjata lagi melantoer,“ kata gadis kita, „sesoeatoe gredja dan krenteng, oemoemnya ada mendjadi tempat terboeka jang boleh didatengin oleh se-gala orang, maka apabila kita jang boekan ada terdiri dari golongan padri, kaloe tjam-poerken diri bersama-sama, pasti gampang menerbitken orang poenja ketjoerigaän, dengan begitoe kitapoenja resia bakal soeker dipegang kekel dan achirnja bisa kedjadian diketahoei oleh Boetjin, hingga djiwa kita nistjaja djadi terantjem.“

„Itoe Ban Jan Am, maskipoen betoel ada dipoledja patoeng boedha berserta berbagi

melaekat, tapi selamanja belon perna dikoen-djoengin oleh orang lelaki, sedeng kaoem prempoean djoega djarang-djarang jang dateng bersembajang di sitoe, hingga keadaän gredja ada amat sepi dan tida begitoe terkenal; begitoe djoega pernanja ada di tempat soenji, gredjanja sendiri bisa dibilang loeas sekali disertaken dengen banjak kamar-kamar, mendjadi ada leloeasa boeat tempat semboeni. Tetapi Siotjia haroes pikir sampe mateng sebelonnja pergi ka sana.”

— „Asal sadja akoepoena kesoetjian diri bisa terpegang betoel, kendati mati akoe tida aken menjesel.”

— „Kaloe begitoe, baeklah, akoe nanti pergi bersama-sama. Thaij Koen jang hargaken tinggi nama kehormatan, tentoelah tida aken berlakoe keras atawa terlaloe riboet boeat ini kedjadian.”

— „Itoelah bener, biarlah kaoe sekarang lebi doeloe pergi ka itoe gredja aken bermoefaketan dengen Sian Leng, soepaja bisa dapet kepastian apakah dia soeka trima kita menoempang, agar hatikoe tida djadi berkoeatir sebegimana sekarang.”

— „Itoe Nie-kho (padri prempoean) ada temaha sekali dengen harta - kekajaän, mendenger bahoea Siotjia lagi menjingkirin diri

boeat hindarken kesoesahan, pastilah ada bekel tjoekoep oewang, tentoe sekali dia soeka trima. Tapi, baek djoega kaloe akoe nanti soeroe anakkoe pergi ka sana boeat bitjaraken terang ini hal."

— „Memang begitoë ada paling betoel, djanganlah berajal lagi, lebi lekas ini oeroesan bisa mendjadi beres ada lebi baek boeat kita.”

Kang Sam So laloe toeroen ka bawah loteng mentjari Kang Tjin Hie, apabila bertemoe ia lantas toetoerken pada sang poe-tra, prihal Siotjia hendak minggat bersama-sama dan menoempang dalem gredja Ban Jan Am boeat toenggoeïn sampe Hong Hoe Kongtjoe bisa oendjoekin diri.

„Lantaran ini,” achirnja Sam So berkata lebi djaoe, „kaoe boleh lantas pergi kete-moeken Sian Leng, bitjaraken ini hal sampe beres. Tetapi inget, djanganlah sekali - kali kaoe toetoerken doedoekna hal jang sebe-ner-benernja, hanja kaoe moesti bisa atoer sedikit tjerita djoesta, soepaja resianja Sio-tjia jang sesoenggoenja tiada sampe diketa-hoi oleh orang loear. Lebi djaoe kaoe bo-leh bilangin Sian Leng, kapan dia soeka tri-ma ditoempangin, Siotjia tentoe nanti kasi-ken soembangan oewang boeat dipake goe-

na ongkos-ongkos."

„Siotjia ampoenja kesetiaän hati dan memegang kesoetjian diri begitoe roepa, Allah tentoe membri berkah," berkata Tjin Hie, „tetapi sebaliknya Sian Leng ada terkenal sebagai satoe prempoean jang amat seraka, sedeng Siotjia toch tiada mempoenjai tjoekoepr banjak oewang boeat penoeken kese-rakahannja. Maka itoe, akoe sanget koeatir Siotjia nanti tiada tahan menanggoeng sengsara serta hinaän jang bakal dirasaken dengen berdiam di itoe gredja, kenapa iboe soeda tiada menjega serta halangin maksoed Siotjia?"

„Akoe djoega soeda oetaraken ini hal pada Siotjia," kata Sam So, „tapi Siotjia tiada maoe ambil poesing, asal sadja dia bisa mendjaga kesoetjian dirinja, sekalipoen mati Siotjia masi merasa ridlah. Ini sebab, kaoe boleh pergi bitjaraken sadja ini oeroesan pada Sian Leng, serta minta kepastiannja jang betoel."

„Kaloe begitoe, baeklah," djawab Tjin Hie, „besok akoe aken pergi ka sana."

Baroe sadja ini iboe dan anak habis bitjara, tiba-tiba keliatan saorang boedak prempoean telah dateng ka sitoe, serta membilang pada Tjin Hie :

„Thaij Koen ada pesen, bahoea lagi ampat

hari Tjoei Ke aken dateng mengantar pandjer, maka itoe kaoe haroes bersedia dan atoer beres segala keperloean boeat bagian di loear."

Begitoelah orang djadi boebaran dan masing - masing pergi lakoeken kewadjibannja.

Sie-gwee Tjap-pek, hari mengantar pandjer; Ko Hong Gie soeda soeroe iapoенja keponakan, Ko Poen Djin, jang djoega ada satoe Kie Djin, mengiringin itoe pandjeran, dari gedong Ko Hoe menoedjoe ka roemanja Kok Thio, dengen di sepandjang djalan dirameken oleh tetaboean jang rioeh.

Tatkala soeda dateng di gedong Kok Thio, semoea pandjeran itoe telah ditrima oleh Thaij Koen dengen tiada mempoenjai kegoembirahan sama sekali, serta kemoedian serahken kombali barang-barang pandjeran balesan boeat dibawa ka gedong Ko Hoe.

Sorenja, Thaij Koen lantas kasi persen pada sekalian boedjang-boedjang dan boedak-boedaknya jang telah berkerdja tjape dalem ini oeroesan, sedeng besok pagi ia laloe moelai atoer-mengatoer itoe barang-barang perhiasan jang bekas dioentoekin boeat Beng Siotjia tempo hari, soepaja di waktoe kawin bisa dibawa oleh Jan Giok.

Samentara itoe, gadis kita telah mendesek

lagi Sam So aken sigra soeroe Tjin Hie boeat lekas pergi ka Ban Jan Am, kerna kaloe bisa besok malem Jan Giok aken lantas minggat dari roemanja. Sam So djadi kepaksa tjari lagi anaknya, serta toetoerken kemaoean sang nona.

Tjin Hie trima baek ini pesenan, maka setelah orang dahar pagi, dengen tjepeit dan terboeroe-boeroe, ia laloe berdjalan menoedjoe ka gredja Ban Jan Am. Koetika sampe dan baroe sadja masoek ka dalem, di roeanan pertengahan djoestroe ia berpapasan dengen Sian Leng, jang menanja padanja:

„Ada oeroesan apakah Kang Taij Siok telah dateng kemari dengen roepa keliatannya sedikit goegoep ?”

„Ada satoe oeroesan penting jang hendak bitjaraken pada Ie,” djawab Tjin Hie sembari berdjalan teroes masoek ka dalem, tjari serta ketemoei iapoenna Ie, jaitoe Hoan Djoe, dan begitoe berdjoempa. Tjin Hie lantas berkata :

„Siauw Tit dateng boeat bermoefaket dengen Ie atas satoe oeroesan perloe !”

„Doedoeklah doeloe, Hian Tit,” berkata Hoan Djoe sembari oendjoekin pada Tjin Hie satoe bankoe, „dan tjeritakenlah apa adanja itoe oeroesan.”

Kang Tjin Hie poen lantas berdoedoek, serta moelai tjerita dengen sedikit berdjoesta katanja :

„Bahoea di taon laloe, Thajj Koen soeda pertoenangken Dji Siotjia, Jan Giok, pada familie Hong Hoe, tetapi sekarang berbalik hendak dinikahken pada keponakan njera ber-nama Tjoei Pan Hong. Sebaliknya Siotjia jang ternjata berhati setia dan inget kesoe-tjiaannja sebegimana wadjibnya orang prem-poean, tentoe sadja tiada soeka trima dilakoeken begitoe, maka beroelang-oelang dia hendak nekat membinasaken diri sendiri, tetapi iboe seberapa bisa soeda menjega, begitelah laloe diambil poatoesan aken kersama-sama dateng menoempang di sini boeat menjingkirin diri samentara waktoe, tetapi belon taoe apakah Am Tjoe nanti soeka trima ?“

„Ach, Hian Tit,” berkata Hoan Djoe dengan golengin kapalanja, „ketahoeilah bahoea keadaän ini gredja ada amat sepi, sedeng Sian Leng sebagai tetoeanja ada miskin sekali serta kemaroek harta. Sebaliknya kaoepoenna Dji Siotjia tiada mempoenjai banjak oewang simpenan, hingga djikaloe dia moesti tinggal di sini, ampir bisa dipastiken dia tentoe bakal hadepin kesengsaraän dan perlakoean jang tida manis. Lantaran

ini akoe pikir ada lebi betoel kapan Siotjia-moe tjari sadja laen tempat boeat menoempang, sekali-kali djanganlah tjoba dateng berdiam di sini."

"Sian Leng ada saorang seraka," djawab Tjin Hie, "Siauw Tit dan Boetjin djoega beroelang-oelang telah peringetin pada Siotjia, tetapi soesanja tiada ada laen tempat poela jang boleh dipergiken. Djoega Siotjia soeda njataken jang dia asal sadja bisa memegang tegoe kesoetjian dirinja, biarpoen moesti idoep sengsara dia aken merasa seneng, oepama liwatin hari dengen mengambil oepahan dari perkerdjaän djait-mendjait. Marilah Ie, kita bersama-sama pergi meminta pada Sian Leng soepaja dia soeka trima Siotjia dateng tinggal di sini."

"Baeklah, kaloe begitoe," berkata poela Hoan Djoe, "kaoe boleh toenggoe sadja sebentar di sini, akoe aken pergi panggil Sian Leng dan adjak dia dateng kemari, agar kitaorang bisa bitjara lebi merdika."

Sehabisnya oetjapken ini perkataän, Hoan Djoe sigra berlaloe dari kamarnja dan se-saat kemoedian ia telah balik kombali dengan terikoet oleh Sian Leng. Tjin Hie bangoen berdiri dan membri hormat, kemoedian laloe pada berdoedoek. Lagi sakali Tjin Hie oe-

langken prihal maksoednja iapoenja nona berserta sebab-sebabnja.

„Oh, oh, soenggoe soeker bisa didapet-ken saorang gadis sematjem Siotjia jang berhati setia dan berkebedjikan tinggi,” kata Sian Leng. „di blakang masih ada doea boeah kamar kosong, kiranya tjoekoep boeat di-tempatin oleh kaoepoenja Siotjia; tjoemalah di sitoe melaenken ada doea tempat tidoer kosong, tapi tiada mempoenjai kasoer, ban-tel maoepoen klamboe. Laen dari itoe, akoe perloe djoega menerangken bahoea kitaorang di sini semoea idoep dalem kemiskinan, pagi dan sore hanja makan boeboer dengan sedikit sajoeran, dari itoe soepaja Siotjia tiada terlaloe alamin kesengsaraän, biarlah di wak-toe hendak dateng kemari, djangan loepa bekel oewang banjakan boeat dipake blandja.”

„Akoepoenja Dji Siotjia memang soeda biasa dengan pengidoepan paling himat,” berkata Tjin Hie, „djoega radjin dan mengarti betoel dalem perkerdjaän tangan orang prempoean, seperti mendjait dan menjelam, hingga kaloe dia soeda tinggal di sini, pasti membantoe pada Soe Hoe dengan tenaganja.”

„Aken tetapi,” menjampoer Hoan Djoe, „apa kaoeorang telah ambil ketetapan hari kapan hendak dateng kemari, kerna ini djoega

perloe diterangken lebi doeloe."

„Besok malem seliwtinja djam doe, kitaorang aken moelai brangkat dari roema, moehoen Soe Hoe soeka memboeang sedikit tjape aken toeloeng memboekaken pintoe," saoetnja Tjin Hie.

„Itoelah tiada halangan," kata Sian Leng, „biarpoen kaoeorang dateng sampe djam tiga atawa djam ampat, kitaorang pasti aken menoenggoe djoega dengen betoel."

Dengan pengrasaän lega, Tjin Hie laloe berpamitan pada kedoea padri itoe dan berdjalan poelang dengen boeroe-boeroe.

Samentara di sini, Sian Leng telah mesen pada Hoan Djoe aken moelai djoega bersiken itoe kamar-kamar blakang, soepaja disediaken boeat tempatnja tamoe - tamoe jang bakal dateng besok malem. Sebaliknya Kang Tjin Hie setelah sampe di gedong Lauw Hoe, langsoeng ia ketemoeken iboenga dan tjeritaken satoe persatoe tentang perkerdjaännja, begitoepoen aken itoe perdjandjian besok malem.

Apabila Sam So mendapet ini warta, ia poen lantas dateng ka loteng, dengen ati-ati laloe sampeken poela pada Jan Giok dari apa jang Tjin Hie soeda toetoerken padanja; lebi djaoe ia peringetin aken si gadis begi-

toe dapet tempo baek, sigra moelai bebena iapoenja sekalian barang perhiasan dan laen-laen barang keperloean hari-hari, agar di besok malem iaorang bisa brangkat dalem keberesan.

„Ja, boeat ini boleh traoesa diiboekein,” kata Jan Giok, „sedari brapa hari segala apa akoe soeda bikin persediaän setjoekoep-nja, tinggal menoenggce tempo boeat brangkat.”

Satoe malem soeda liwat zonder ada ke-djadian apa-apa jang dirasa penting boeat ditoetoerken.

Besoknja, sesoeda makan pagi, Jan Giok preksa kombali iapoenja barang-barang jang soeda dikoempoel baek kaloe-kaloe ada jang kesingsal. Bener djoega, sebegimana diketa-hoei oleh brapa orang jang bersangkoetan, Jan Giok tiada mempoenjai banjak oewang simpenan, kerna sebagi anak tiri jang tiada disajang, apa heran gadis kita tiada beroleh kelonggaran dalem oeroesan oewang. Ia tjoema mempoenjai seratoes tael perak lebi oewang simpenan, jaitoe sisa kelebian dari oewang blandja djaroem, benang dan poe-poer, jang dikoempoel sedikit dengen sedikit sedari bertaon-taon. Laen dari itoe, adalah iapoenja berbagi-bagi barang perhiasan jang

berharga sama sekali di antara satoe djoem-blah lima atawa anemratoes tael perak. Sebegini adanja Jan Giok ampoenja antero kekajaän.

Sang matahari moelai tjondong ka barat, pelahan-pelahan seloeroe djagat poen berada dalem gelap-goelita. Waktoe mana, semoea orang dalem roema soeda pada bersantap malem, sebentar lagi masing - masing telah berada dalem kamarnja aken sedia boeat mengaso. Samentara laen orang keliatannja bakal liwatin itoe malem sama sadja seperti biasa, adalah sebaliknja boeat Jan Giok dan Sam So. Marika berdoea sama berdoedoek dalem kamar di loteng dengen hati berketak-ketik, sembari menoenggoe datengnja sang waktoe.

Boeat sekoetika lamanja, iaorang berdoedoek dalem keadaän saling membisoe, sampe achir-achirnja Jan Giok roba itoe keadaän dengen iapoenna soëra memerenta pada si boedak Hwi Loan.

„Pergilah tidoer doeloe, Hwie Loan,” demikian katanja, „akoe djoega aken lekas masoek tidoer.”

Dasar pemales, Hwi Loan mendjadi giring mendenger ini prenta, zonder menoenggoe sampe dioelangken boeat kadoea kalinja,

tjepet sekali ini boedak ketjil lari masoek ka dalem kamarnja sendiri, toetoep pintoe dan djatoken kapalanja di bantel laloe tidoer poeles tiada brapa saat berselang.

Samentara itoe, Jan Giok telah dapet pikiran, seperginja ini malem belon taoe sampe taon kapan baroe ia bisa bertemoe poela dengen sang iboe — biarpoen iboe tiri — hatinja dirasaken piloe, berbareng timboellah keinginan boeat bisa liat lagi sakali parasnja itoe orang toea, sambil djoega dengen tjara samar bisa membri slamet tinggal.

Begitoelah kemoedian ia laloe minta Sam So bawa palita aken bersama-sama dateng di kamarnja Thaj Koen, di mana setelah lebi doeloe membri hormat selajiknjia baroe-lah ia berdoedoek. Itoe waktoe Thaj Koen djoestroe sedeng minoem thee tertjamboer Djin Som, masih tinggal setenga mangkok laloe kasiken pada Jan Giok boeat diminoem.

Sesoeda itoe, ini iboe dan anak laloe saling membitjaraken soeal-soeal jang berhoe-boeng dengen pertjerean marika, dalem anggepan Thaj Koen bahoea Jan Giok soeda keloearken ini oetjapan jalah berhoeboeng dengen iapoenna hendak keloeear menika, sebaliknja bagi gadis kita adalah dipake boeat alesan ia membri slamet tinggal kerna maoe

minggat.

Berdoedoek lagi sedikit lama, baroelah Jan Giok bersama Sam So berlaloe dari kamarnja Thaij Koen dan balik poelang ka loteng dalem kamarnja sendiri, mengambil tempat doedoek di pembaringan, sedeng api palita dibikin begitoe ketjil. Waktoe mana, keadaän di sekiternja terdapat soenji-senjaszonder kedengeran soeara soeatoe apa.

„Inilah ada waktoe baek boeat kitaorang lantas brangkat,” achirnja kedengeran Kang Sam So moelai berkata, berbareng itoe ia lantas berdjalan toeroen ka bawah loteng dengen tindakan amat ati-ati. Kebetoelan di sitoe ia berpapasan dengen Tjin Hie jang soeda menoenggoe sedari sedikit saat ber selang. Sam So laloe pesen aken sang poetra menanti sebentar, sedeng ia sendiri laloe balik poela ka atas loteng, mengambil itoe satoe boengkoesan besar dalem mana berisi Jan Giok dan Sam So ampoenja pakean-pakean, bawa toeroen ka bawah serahken pada Tjin Hie.

Kemoedian ia balik lagi naek ka atas boeat mengambil serentjengan anak koentji, jang memang sedari doeloe ada menjadi iapoенja pegangan. Samentara itoe, Siotjia kita telah simpen baek iapoенja semoea barang perhi-

asan dalem satoe doos, begitoe djoega ia-poenja semoea oewang simpenan ada disim-pen pada satoe doos laen. Begitoelah dengen membawa ini doeae doos, kedoea prempoean itoe lantas toeroen ka bawah loteng, dan bersama-sama djalan menoedjoe ka blakang. Tjin Hie berdjalan lebi doeoe sambil me-menteng boengkoesan, aken memboeka se-moea pintoe satoe persatoe. Njatalah dari Siauw Hoen Kok sampe ka pintoe paling blakang dari kebon boenga, sama sekali orang moesti meliwin tin anem lapis pintoe.

Tempo soeda berada di bagian pintoe paling pengabisan, Kang Tjin Hie laloe letakin itoe boengkoesan berserta palita jang dibawa di atas tana sambil berkata :

„Toenggoe sebentar di sini, akoe aken pergi tjolong saekor koeda toenggangan soe-paja boleh didoedoekin oleh Boetjin dan Siotjia boeat bisa lekas sampe pada tempat jang ditoedjoeïn.”

„Ja, itoelah baek sekali,” berkata Jan Giok „tetapi ati-atih, djangan sampe dapet diketa-hoei oleh toekang koeda.”

Tjin Hie memanggoet dan berlaloe dari sitoe, sedikit saat kemoedian ia soeda balik kombali dengen menoentoen saekor koeda jang lengkep sama pakeannja teroes bawa

keloear sampe di loear pintoe kebon.

Lebi doeloe pintoe kebon dikoentji dari loear, baroelah Tjin Hie angkatin si iboe berdoedoek di atas koeda, blakangan Siotjia diangkat taro di depannja Sam So, demikianlah itoe koeda lantas dikasi lari dengan pelahan, sedeng Tjin Hie mengikoetin dari blakang dengan djalan kaki.

Tiada brapa lama, marika keliatan telah sampe di depan gredja Ban Jan Am, di mana Tjin Hie laloe angkat kasi toeroen Sam So dan Jan Giok dari koeda, kemoedian langsoeng mengetok pintoe gredja, jang dengan traoesa menoenggoe lama, itoe pintoe soeda terboeka, di mana keliatan anem orang padri prempoean masi pada menoenggoe, serta silahken orang masoek ka dalem, teroes dateng ka itoe kamar kosong di bagian blakang.

Masoek ka dalem kamar, orang dapetken di sitoe tjoema mempoenjai doea pembaringan kosong jang tiada poenja apa - apanja. Meliat begitoe, Sam So djadi berkata dengan menggojang kapala :

„Kasoer dan tiker semoea tiada ada, begimanalah bisa ditidoerin.”

„Biarlah,” berkata Jan Giok, „besok pagi toch masi ada tempo boeat disediaken satoe persatoe.”

„Di tempat akoe masih ada doea potong tiker toea,” kata Hoan Djoe, „akoe boleh ambil bawa dateng, boeat dipake liwatin ini satoe malem.”

Sehabisnya oetjapken ini perkataän, Hoan Djoe laloe pergi ka kamarnja, serta ambil itoe doea tiker dan bawa ka kamar kosong terseboet, kemoedian atoer beres di atas pembaringan. Samentara Kang Tjin Hie poen telah letakin boengkoesan jang ia bawa di atas itoe, seraja berkata :

„Akoe sekarang hendak poelang, sedeng kemoedian bila ada kabar apa-apa jang penting di dalem gedong, akoe tentoe dateng membri taoe kemari.”

„Ja, Tjin Hie, Kaoe soeda banjak tjape, boeat mana akoe tiada loepa hatoerken trimma kasi,” berkata Jan Giok, „dan ingetlah kapan di sana ada kabar apa sadja jang bersangkoetan dengen dirikoe, hareplah kaoe soeka dateng kasi taoe di sini.”

Tjin Hie memanggoet dan lantas berdjalan keloear pintoe gredja, menoenggang itoe koeda langsoeng dilariken sekernasja boeat bisa lekas sampe di gedong Kok Thio.

Samentara itoe, adalah Jan Giok bersama itoe sekalian padri - padri prempoean, saling mendjalanken peradatan sebegimana lajiknja

orang baroe bertemoe moeka, lebi djaoe saling perkenalken nama satoe sama laen.

Kemoedian Jan Giok laloe boeka itoe satoe kotak jang ada berisi iapoenja oewang simpenan, ambil keloeear sepoeloe tael perak dan taro di satoe samping, seraja berkata :

„Sam So, biarlah dengen ini oewang kita besok sediaken doea stel tiker, kasoer, bantel dan klamboe.”

Ia keloearken iagi sepoeloe tael perak dan serahken pada itoe bebrapa padri sembari membilang :

„Akoe aken berdiam di sini boeat mengekalken kesoetjian diri, boeat mana, sedikit banjak pasti bakal menjoesaken atawa meropotin pada Liat-wie Soe-hoe, maka ini sedikit soembangan jang ampir tiada berarti, soedilah apa kiranya ditrima zonder tampikan maoepoen tjelahan.”

Sekalian padri itoe djadi bersoekatjita dan trima itoe pembrian dengen hatoerken banjak trima kasi.

Kemoedian Jan Giok laloe kasiken lagi oewang pada Sian Leng dan berkata :

„Inilah ada sepoeloe tael perak lebi, diserahken pada Soe-hoe aken goena toeloeng mengoeroesken, boeat kitaorang berdoea ampoenja blandja makan samentara waktoe.

Sedeng kaloe di sini ada perkerdjaän mendjait maoepoen menjuelam. Soe - hoe boleh kasiken sadja padakoe, akoe tentoe nanti membantoe sepenoенja tenaga."

Sian Leng jang mengharep-harep ia bakal bisa trima banjak oewang, tetapi sekarang ia tjoema bisa hadepin ini djoemblah jang begitoe ketjil, soenggoe itoe ada di loear doegaännya. Tiada heran, kaloe dalem hatinja soeda terbit pengrasaän tiada seneng. Tetapi, apabolehboeat, ia kepaksa trima djoega itoe oewang.

Achirnja, semoea padri - padri itoe lantas pada boebaran dan balik poelang ka kamarnja masing-masing boeat mengaso.



Maka terseboet Kang Tjin Hie setelah sampe di kebon blakang dari gedong Lauw Hoe, dengen tjetep ia boeka pintoe kebon dan masoekin poela dengen ati-ati itoe koeda di dalem kandangnja. Sesoeda itoe, baroelah ia balik kombali di deket pintoe kebon, taro semoea koentji - koentji di atas tana, langsoeng kemoedian ia balik poelang dalem kamarnja sendiri dan rapetin pintoenja, boeka pakean loearnja teroes naek ka pembaringan boeat belaga tidoer.

Kebetoelan sekali Hwi Loan janq soeda tidoer njenjak, koetika djam lima liwat sedikit, kerna rasaken peroetnja sedikit moeles ia djadi mendoesin, lantas bangoen dari pembaringan dengen niatan hendak pergi boeang aer, tapi iapoenja palita soeda padem, hingga inilah membikin ia djadi bingoeng sekali, kerna Hwi Loan memang ada amat pena-koetan. Ia laloe dateng ka kamarnja Kang Sam So boeat mengambil api, koetika pintoe soeda ditolak olehnya, tertampak api di palita masi idoep, tapi tjoema mengasi tjahaja begitoe goerem, sedeng dalem kamar tiada kedapetan saorang djoega. Ia mengira Sam So tentoe masi berada dalem kamarnja Siotjia, maka boeroe-boeroe ia dateng ka sana, betoel djoega ia dapetken pintoe kamarnja sang nona tiada tertoe toe, tetapi api palita di itoe kamar ampir mirip seperti tiada ada terpasang saking goeremnya. Hatinja semingkin djadi takoet, lekas sekali ia besarken apinja dan soeloehin ka sana-sini sekiternja kamar dan biar beginana djoega ia soeda tiada dapet liat ada orangnya, baek Sam So maoepoen Siotjianja.

Hwi Loan djadi bertjoeriga, dengen tiada memboeang tempo poela, sigra djoega ia lari toeroen ka bawah loteng dengen mak-

soed hendak merapportken ini hal pada Thajj Koen, tetapi tiba-tiba sagoeloeng angin keras dateng menioep, membikin sang palita jang dibawa padem apinja dan ia hadepan satoe kegelapan jang menakoetin, hingga inilah membikin ketakoetannja sang boedak semingkin bertamba-tamba besar. Ia mendjerit dan menangis dengen soeara keras, begitoe seteroesnja sampe di depan kamarnja Thajj Koen.

Dibikin kaget oleh ini soeara, Ko Thajj Koen poen djadi mendoesin dengen lekas, sebelonnja dapet taoe apa soeda terdjadi, dalem hatinja lebi doeloe telah rasaken soeatoe firasat tiada baek, kerna beranggepan dirinja ini waktoe sedeng hadepin keapesan, ternjata dari tertawannja iapoenna poetra kadoea dalem tangan penjamoen, samentara menoeroet oedjoednja orang doeloe - doeloe, adapoen sesoeatoe mara-bahaja kebanjakan tiada maoe dateng sendirian; begitoelah tempo baroe sadja dapet denger soeara tangisan dari si boedak Hwi Loan, tjeplet sekali ia mendoega ini tentoe soeda ada lagi satoe kabar tiada beroentoeng.

„Hwi Loan,” achir-achir Thajj Koen memanggil, „diamlah, djangan kesoesoe menangis. Masoeklah lekas dalem kamar sini !“

Berbareng oetjapken ini perkataän, dengen lekas Thaij Koen bangoen berdoedoek di pembaringan, serta memake pakean loearnja, sedeng iapoenja satoe boedak ketjil jang selaloe ada tidoer dalem kamar itoe, telah boekaïn pintoe boeat kasi Hwi Loan masoek ka dalem.

Apabila soeda berada di hadepannja Thaij Koen, Hwi Loan lantas menoetoerken hal-nja Siotjia bersama Sam So setaoe telah pergi ka mana, hingga melaenken ia sendiri jang berada di loteng Siauw Hoen Kok, inilah menjebabken ia djadi ketakoetan.

„Kang Sam So boleh djadi ada oeroesan maka soeda bangoen lebi doeloe,” kata Thaij Koen dengen bertjoeriga, „tetapi Siotjia djoega tiada ada, inilah tentoe ada sebabnya.“

Ia lantas prenta panggil bangoen laen-læn boedak prempoean, membawa palita dan sama - sama dateng ka loteng Siauw Hoen Kok, aken tetapi begimana djoega orang mentjari, toch tiada kedapetan saorang djoega. Kemoedian orang laloe dateng dalem kamar Siotjia, lakoeken pemereksaän jang amat teliti, achirnja koetika boeka dan liat latji-latji dari medja berias. Thaij Koen diam - diam djadi merasa amat terprandjat sembari berkata dalem hatinja :

„Tidakah dia soeda minggat dan angkoet semoea barang perhiasannja.”

Kombali Thaij Koen memboeka dan preksa satoe persatoe itoe bebrapa peti - peti jang ada dalem sitoe, maka terdapat bahoea se-gala pakean-pakean jang baek telah linjap, tjoema ketinggalan bebrapa lembar pakean-pakean toea, inilah membikin Thaij Koen semingkin djadi goegoep dan tiada taoe apa moesti berboeat.

„Tentoe sekali itoe anak doerhaka telah minggat bersama-sama kendaknja,” demikian berpikir Thaij Koen, „dan Sam So pasti ada mendjadi orang perantaraän dalem ini per-boeatan boesoek, kaloe tiada, masa bisa dja-di begitoe.”

Kemoedian Thaij Koen laloe toeroen lagi dan berdoedoek di bawah loteng, serta prenta boedak prempoeannja aken lekas pergi panggil Tjin Hie dateng kemari, begitoelah saorang boedak prempoean telah berlaloe setelah mendenger ini prenta. Samentara Thaij Koen soeda memesen lebi djaoe pada sekalian boedak - boedaknja itoe, seraja ber-kata :

„Keboesoeukan dalem roema tiada boleh sampe teroewar di loearan, maka itoe boeat ini kedjadian haroeslah didjaga djangan sam-

pe diketahoei oleh boedjang-boedjang lelaki di loear. Barang siapa jang banjak moeloet sehingga ini kedjadian sampe tersiar, dia tentoe aken dihoekoem mati. Ingetlah baek-baek !“

Sehabisna berkata begitoe, dengen berpaling pada Hwi Loan, Thajj Koen menjentak katanja :

„Angkaoe jang selaloe berada di atas loteng, moestinja mengetahoei kaloe ada orang lelaki jang sering - sering dateng ka sitoe ? Hajo, bitjaralah lekas dan dengen teroes-terang, agar soepaja terloepoet dari rangketan !“

Berbareng itoe, Thajj Koen laloe prenta saorang boedak prempoean laen aken lekas pergi ambil bawa dateng itoe tjamboek koe-lit dan sediaken di sini.

„Sama sekali tiada ada orang lelaki jang taoe naek ka lotengnya Siotjia, begitoe djoega laen-laen boedak prempoean poen ampir tiada ada jang brani dateng ka sitoe bila tiada ada oeroesan jang penting,“ djawab Hwi Loan.

Thajj Koen ambil itoe tjampoek dan sebet satoe kali di atas medja, sembari berkata poela dengen mata mendelik :

„Kaloe tiada ada orang jang taoe naek

ka loteng, apa sebab mendadak Siotjiamoe boleh lari minggat. Ja, kaoe tentoe masih belon maoe mengakoe, djika belon disebet sampe mati !"

"Ampoen, Thaij Koen, memang sebetoel-nja boedak tiada taoe satoe apa," berkata Hwi Loan dengen menangis keras. „jang boedak taoe jalih sedari Thaij Koen bawa Siotjia pergi berkoendjoengan ka gedong Ko Hoe, poelangnya saben - saben keliatan Siotjia dengen Kang Sam So sering beroendungan setjara bisik-bisik, terkadang Siotjia sampe moesti mengela napas pandjang atawa mengoetjoerin aermata. Biar begimana djoega sekali - kali boedak tiada diidzinken boleh mendenger marikapoenja pembitjaraän. Sampe di wakoe - wakoe blakangan, koetika soeda ditrima soerat balesan dari Kok Thio jang perkenanken Siotjia boleh berdjodoan dengen familie Tjoei, keliatanlah Siotjia menjadi semingkin goegoep dan beroepa seperti orang ketakoetan, siang-malem ampir tiada poetoesnja bikin permoefakatan setjara resia dengen Sam So. Begitoelah tadi malem, siang - siang boedakmoe ini disoeroe tidoer, hingga boedak poen djadi apabolehboeat lantas masoek tidoer lebi doeloe, zonder merasa tjoeriga satoe apa, lagipoen tiada taoe

apa sebabnya Siotjia sampe moesti mlariken diri. Oh, Thaij Koen, inilah semoea ada boedak ampoenja pengakoean jang sebetoel-betoelnja."

Boeat sedjoeroes lamanja Thaij Koen tinggal diam sesoedanja mendenger perkataän si boedak ketjil terseboet, kemoedian dengen roepa penoe kemorkahan besar ia memaki:

„Apa sebab Kang Tjin Hie sampe sekarang masih belon djoega keliatan dateng ?”

Thaij Koen lantas prenta poela saorang boedak prempoean aken lekas pergi liat dan panggil lagi Tjin Hie soepaja maoe dateng dengen lekas kemari, sebab Thaij Koen soeda tiada sabaran menoenggoe lebi lama.



Kesemsem paras eilok,

Tjoei Pan Hong madioeken lamaran.

doce sono i numeri  
secondi indicati per ogni mese

## XXXII.

Ko Thaij Koen pindaken boenga menjamboeng poehoen. Tjoei Pan Hong mengiser timoer ganti barat.

Sjahdan itoe boedak prempoean jang diprenta panggil Kang Tjin Hie, tempo sampe di kamar orang, ia dapet liat itoe boedak jang disoeroe lebi doeloe ka sitoe, masih djoega memanggil-manggil Tjin Hie jang belon maoe bangoen. Apabolehboeat dengen terboeroe-boeroe ia kepaksa balik kombali mengadep Thaij Koen sembari merapport, katanja :

„Boleh djadi tadi malem Kang Tjin Hie ada minoem mabok, maka begimana djoega dipanggil sampe sekarang dia masih belon mendoesin.”

Thaij Koen djadi berpikir dalem hatinja, bahoea Tjin Hie jang ternjata ada orang berhati djoedjoer, amat bisa djadi dalem ini perkara minggat, sama sekali ia tida toeroet tjampoer, makanja dia bisa tidoer begitoe njenjak.

Samentara itoe, si boedak pertama jang masih tinggal menggoegah pada Tjin Hie, brangkali saking pegelnja dengen kasar ia

geret-geret orang poenja kaki-tangan, sambil berseroe katanja :

„Hajo, lekas bangoen, Thajj Koen perloe bitjara padamoe !”

Tjin Hie poera-poera berlakoe sebegima-na orang baroe mendoesin dan menanja de-njen soeara tiada bernapsoe :

„Masi begini pagi, apa sebab kaoeorang soeda begitoe repot dan riboet tiada ke-roean ?”

Sang boedak poen lantas menoetoerken prihal Siotjia dengen Sam So telah minggat dari pintoe blakang setaoe pergi ka mana; ini sebab Thajj Koen sekarang panggil pa-danja hendak bikin sedikit pertanjaän.

Tjin Hie lompat dari pembaringannja, de-njen aermata berlinang-linang ia berkata :

„Kaloe betoel iboekoe melariken diri, oh, Allah ! Siapakah lagi orangnya jang akoe boleh boeat andelan ?”

Sehabisnya berkata, Tjin Hie lantas boe-roe-boeroe masoek ka dalem, begitoe dapat liat Thajj Koen, ia menanja sambil mena-ngis :

„Sebetoelnja, ka manatah iboe soeda per-gi ?”

Ditanja begitoe, Thajj Koen mendjadi sa-net morka dan dengen soeara aseran ia

mendamprat :

„Hm ! Kaoeorang, iboe dan anak, bersama-sama soeda bersekongkol boeat mengandjoerin Siotjia minggat dari sini. Tapi berbalik sekarang kaoe belaga seperti orang tida taoe soeatoe apa, malahan soeda brani bikin itoe pertanjaän.”

Dengen tiada saoetin orang poenja bitjara, Tjin Hie teroes sadja menangis malah lebi keras.

„Oh, iboe, soenggoe kaoe ada begitoe tegal !” katanja dengen soeara mirip ratapan, „di manakah kaoe soeda pergi ? Begimana-kah nanti djadinja dirikoe ini, kerna tentoe tiada ada orang jang tjoetjiken dan djaitin pakeankoe. Ach, akoe bakal hadepin pengidoepan moelarat dan tersia-sia !”

Thaij Koen semingkin goesar dan dengen separo memerenta, ia berkata lagi:

„Anakkoe soeda beroemoer dewasa dan sekarang minggat tinggalken roema, itoelah ada satoe noda bagi nama kehormatan roema tanggakoe, maka akoe larang kaoe bersoeara keras boeat menjega djangan sampe ini kedjadian jang mendatengken kehinaän tersiar di peloearan. Dan menoeroet pantes, akoe moesti oesir kaoe berlaloe dari sini, tapi kerna menginget jang kaoe selamanja

ada berkerdja di sini dengen djoedjoer dan setia, akoe tida tega berboeat begitoe. Kaoe boleh tetep lakoeken perkerdjaänmoe seperti biasa dan djangan males."

"Oh, banjak trima kasi boeat Thajj Koen ampoenja boedi jang demikian besar," berkata Tjin Hie sambil mantoek - mantoekin kapalanja, "tetapi iboe tentoe lagi kena pengodaän setan-iblis, maka itoe sampe kedadian minggat dari sini. Hamba pikir, aken toelis sadja bebrapa lembar soerat plekat, boeat ditempelken pada berbagi - bagi prapatan djalan besar, soepaja bisa menjerepin dengen lebi gampang di mana adanja iboe ini waktoe."

"Edan!" membentak Thajj Koen, "kaoepoenja iboe soeda bawa minggat Siotjia, perloe apa moesti ditjari! Lagipoen djika moesti menempel soerat plekat, orang seloerroe kota bakal mendapat taoe ini hal, itelah akoe tida maoe. Dan djoega sebegima-na akoe' soeda peringetin, kaloe kaoe sampe oewarken ini kedjadian di loearan, nistjalah kaoe bakal dikasi hadjaran zonder ampoen lagi!"

"Sesoeda Thajj Koen memesen begitoe," berkata Tjin Hie, "hamba tentoe tida brani banjak bitjara."

Dan bener sekali jang ini kedjadian ada tertotoeop begitoe rapet, kerna boekan sadja orang loear tiada mendapet taoe, sedengken boedak-boedak lelaki dalem itoe gedong sekalipoen, soeda tiada ada satoe djoega jang bisa mengetahoei.

Samentara itoe, Thaj Koen berpikir sendirian dalem hatinja, bahoea iapoenna soeami seringkali soeka berlakoe kliwatan, maka itoe sekarang beroleh ini matjem - matjem pembalesan, sedeng di blakang hari belon taoe apa djadinja ?

Demikianlah Thaj Koen seteroesnya tinggal berpikir dengan bingoeng, hingga itoe hari ia tiada napsoe makan, hanja berdoedoek teroes sampe tengahari di Hoa-thia, dengan pikiran kesel dan pengrasaan tiada enak.

„Ach.” achirnya Thaj Koen menggren-deng poela, „Tjoei Ke poenja pandjeran telah ditrima, sedeng bakal nona penganten soeda tiada ada, pastilah dia nanti dateng bikin riboet kemari. Soenggoe ada keter-laloean sekali, jang itoe soendel sebelonnja orang trima pandjeran tiada maoe minggat, hanja sengadja lakoeken itoe sesoeda oeroesan mendjadi mateng, semata-mata seperti hendak bikin akoe mendapet maloe besar.

Ja, begimanalah akoe moesti berboeat? Ter-laloe menjakin hati?"

Sedeng Thaij Koen berada dalem kedjeng-kelan, tiba-tiba saorang boedak prempoean telah dateng mengadep padanja, sambil mem-bri taoe :

„Penggawal pintoe ada merapportken ba-hoea Bwe Kho Nio dari Hok Kian, Jan Peng Hoe telah dateng kemari.”

Thaij Koen merasa bimbang mendapat ini rapportan, tetapi ia lantas pergi ka loear, titah orang memboeka pintoe tengah boeat oendang sang tetamoe masoek.

Terseboet Lauw Tjiat ada mempoenjai saorang ade prempoean Tjintong, soeda me-nika pada saorang bernama Bwe Tjam Tjhoen, siapa poen ada berasal dari keloe-aran Kie Djin, mengandel dengen Lauw Tjiat ampoenja pengaroeh jang besar, maka sampe ia bisa mendjabat pangkat Tie Hoe dari residentie Jan Peng Hoe provincie Hok Kian. Ia tiada mempoenjai poetra, selaennja satoe anak prempoean, jang bersama - sama sang istri ada ikoet tinggal di tempat per-kerdjaännya.

Bwe Tjam Tjhoen ada terkenal sebagai satoe pembesar jang mata doeitan, soeka trima soeapan dan lakoeken pemeresan, lebi

djaoe dalem segala perkara atjapkali ia oendjoek sewenang - wenangnya, hingga antero pendoedoek dalem pegangannya pada mera-  
sa penasaran dan mendendem sakit hati padan-  
ja Sampe kedjadian orang banjak adoe-  
ken ini pembesar pada ambtenaar jang lebi  
tinggi. Tétapi, itoe berbagi-bagi ambtenaar  
jang kebanjakan taro soengkan pada Lauw  
Tjiat, soeda tinggal diam ini oeroesan dengan  
tiada maoe ambil poesing.

Tiada njana, blakangan soeda kedatengan  
saorang Soen Boe baroe boeat bilangan  
Hok Kian, bernama Tjioe Teng Siang, jalah  
berasal dari keloearan Lie Po Sie Long. Dia  
inilah ada satoe pembesar jang adil dan  
djoedjoer, koetika baroe sadja memangkoe  
djabatan terseboet, beroentoen - roentoen ia  
moesti trima soerat - soerat pengadoean dan  
dakwaän boeat segala keboesoekannja Bwe  
Tie Hoe. Soen Boe kita djadi sanget mor-  
ka, ia pikir kaloe ia tiada oendjoekin tangan  
besinja dalem ini hal, nistjajalah keboesoek-  
an-keboesoekan begitoe nanti selaloe teroe-  
lang poela atawa mendjalar semingkin loeas.

Ia lantas lakoeken satoe penjelidikan jang  
amat teliti dan kemoedian dapet mengoem-  
poel setjoekoepnja atas Bwe Tjam Tjhoen  
ampoenja sepoeloe kedosaän besar, laloe

dengen djalan resia mengirimken rekest ka kota radja.

Apabila Seng Tjong soeda membatja itoe rekest dan memereksa satoe persatoe Bwe Tjam Tjhoen ampoenja sepoeloe kedosaän, boekan maen morkanja sri - baginda, tiada tempo lagi ia lantas mengeloearken firman menangkep itoe pembesar doerdjana, bawa ka kota radja boeat dipreksa oleh pengadilan tinggi (Sam Hoat Sie).

Baek djoega ada Lauw Tjiat jang telah menoeloeng sebisa-bisanja, hingga Bwe Tjam Tjhoen terbebas dari satoe hoekoeman mati, tjoema dihoekoem boeang ka bilangan Nia Lam. Selaen itoe, dititahken saorang oetoesan membawa satoe soerat firman pergi ka provincie Hok Kian, aken di sana bersama-sama Soen Boe lakoeken beslag atas Bwe Tjam Tjhoen ampoenja harta-benda.

Adapoен Tjioe Soen Boe jang memang ternjata hendak bertentangan dengan Lauw Tjiat, maka itoe begitoe oetoesan dari kota radja sampe, sigra djoega bersama-sama dateng ka gedongnya itoe pembesar jang berdosa, oesir-oesirin segala boedjang-boedjang dan boedak-boedak prempoean dalem gedong itoe boeat sigra berlaloe. Begitoe djoega Tjam Tjhoen ampoenja istri, Lauw

Sie, berserta iapoenja anak prempoean, Swat Keng, jang sekarang telah masoek oesia anemblas taon dan berparas amat tjantik, toeroet dioesir keloear dari itoe roema, dengen tiada diidzinken boleh membawa barang sepotong barang djoega.

Kemoedian baroelah seantero miliknya Tjiam Tjhoen, jang sebagian moesti didjoegal lelang dimasoekin dalem kas negri boeat keperloean oemoem.

Lauw Sie dengen poetrinja kepaksa sewa roema ketjil dari pendoedoek boeat berdiam sedikit waktoe, kemoedian laloe djoegal marikapoenja boedak ketjil aken goena ongkos di perdjalanan, begitoelah oleh kerna tiada ada laen tempat jang boleh ditoempangin, marika kepaksa dateng di Koen Beng Koan boeat menoempang pada Ko Thaj Koen.

Sjahdan Lauw Sie dengen poetrinja sampenja di gedong Kok Thio, oleh pengawal pintoe disilahkan masoek ka dalem bersama djolinja, sedeng Thaj Koen itoe tempo telah keloear menjamboet dan lebi doeloe prenta orangnya aken oeroes soepaja itoe djoli berlaloe, baroelah dengen Lauw Sie marika saling mendjalanken, kehormatan sepantesnya, achirnja lantas sama berdoedoek. Samentara itoe Swat Keng poen telah dateng

djoempaken dan membri hormat pada Thajj Koen, serta ambil tempat doedoek di samping.

Sesoedanja boedak prempoean menjoegoe-ken aer thee, Thajj Koen lantas moelai me-nanja, bahoea sang iper ada ikoetin soeami-nja berdiam di Jan Peng Hoe, begimana sekarang bisa ada poenja kesempatan boeat dateng sampe kemari ?

Lauw Sie poen lantas menoetoerken satoe persatoe prihal kedjahatan dan kedosaän apa jang diperboeat oleh soeaminja maskipoen beroelang-oelang ia sendiri bersama anaknya soeda menjega dan membri pikiran boeat tiada dilandjoetken lebi djaoe, toch sia - sia belaka; maka kedjadian sekarang itoe soeami beroleh hoekoeman boeang, seantero milik-nja dibeslag oleh negri. Dan ia bersama poetrinja memdjadi tiada ada tempat boeat menoempang kepaksa dateng kemari dengen pengharepan moegah-moegahan atas kemoe-rahannja sang enso, marika berdoea bisa di-trima menoempang dalem ini gedong.

Mendenger ini penoetoeran, Thajj Koen poen toeroet menjataken menjeselnja hati atas itoe kedjadian, serta oendjoekin jang ia sama sekali tiada merasa kebratan boeat ditoempangin, hingga inilah membikin seneng batinja itoe kedoea iboe dan anak, sembari

sama oetjapken trima kasinja. Lebi djaoe ini enso dan Kho saling membitjaraken laen-laen soeal jang tiada terlaloe penting, sebegimana oemoemnja orang jang baroe berte-moe kombali sesoedanja berpisa sekean taon lamanja.

„Dji Hian Tit, Ke Pek dan Tit Lie, Jan Giok, tentoenja semoea soeda pada menika?” demikian achirnja kedengeran Lauw Sie telah menanja :

Kerna meliat Swat Keng berada sama-sama di sitoe, Thaij Koen djadi merasa koe-rang pantes boeat bitjara sebenernja, malah soeda menjaoet sadja katanja :

„Dari sebab selaloe repot dalem oeroesan roema tangga, maka itoe sampe sekarang masih belon mempoenjai kesempetan boeat menetepken perdjodoannja anak - anakkoe.”

„Hal perdjodoan itoe toch ada satoe oeroesan amat penting,” berkata Lauw Sie, „pantesnja So-so moesti oeroes selekasnja.”

„Ja,” djawab Thaij Koen, „sebaliknja akoe poen kepingin taoe Hian Seng Lie ampoe-nja perdjodoan, soedakah mempoenjai ketetapan? Dan sama siapa?”

„Soeamikoe sebetoelnja tiada anggep hal perdjodoan anaknja ada begitoe penting,” berkata Lauw Sie, „dari itoe Swat Keng

djoega masih belon mempoenjai toenangan."

Mendenger ini perkataan, satoe kegirangan bersemi dalem hatinja Thajj Koen, diam-diam ia berpikir saorang diri bahoea parasnja Swat Keng bila dipadoe dengan ketjantikan-nya Jan Giok, ampir bisa dibilang tiada ter-dapet banjak katjeknja.

"Ja," begitoelah ia berkata pada dirinja sendiri, "mengapa akoe tiada maoe goenaken sadja itoe tjara meminda kembang menjam-boeng poehoen; jalah wadjibken Swat Keng mengganti Jan Giok boeat keloean menika, dengan begitoe boekan sadja akoe bisa ter-loepoet dari seroepa maloe, sedeng Swat Keng poen bisa perolehken satoe djodo-jang bagoes."

Begitoe menetepken ini pikiran Thajj Koen lantas prenta iapoenna semoea boedak-boedak sigra berlaloe dari sitoe dan tiada satoe orang djoega jang bolehr tjoba mentjoeridenger apa jang bakal dibilitjaraken.

Semoea boedak-boedak jang menerima ini prenta, sigra djoega pada berlaloe dengan tjepe. Sesoeda itoe, Thajj Koen lantas moelai tjeritaken satoe persatoe pada Latuw Sie, tentang hal-ichwalnja Ke Pek madjoe di paprangan dan kena ditangkep oleh kawanan brandal, sedeng iapoenna poetri kadoea tadi

malem bersama Kang Sam So soeda minggat dari roema. Lebi djaoe Thajj Koen poen tjeritaken halnja ia soeda trima pandjeran dari familie Tjoei, maka bila marika dapet taoe Jan Giok telah minggat, tentoelah sedikitnya nanti dateng bikin riboet kemari, hingga itoe bakal menerbitken satoe onar besar dan menjeret aken iapoenza nama familie berlepotan noda.

„Baroesan oleh kerna Hian Seng Lie ada bersama-sama di sini,” kemoedian Thajj Koen meneroesken bitjaranja, „maka itoe akoe merasa berat boeat toetoerken ini hal dengan sedjelasnja, kerna slempang diketawaï bahoea akoe tiada bisa membri pendidikan jang betoel pada anak prempoean. Sebetoel-nya, maskipoen akoe ini ada saorang goblok, tetapi dalem hal mengeroes roema dan membri pendidikan pada anak-anak, akoe merasa tiada perna berlakoe kliroe. Malahan bisa dipertjaja boeat itoe kedjadian, tentoel-nya semoea telah terjadi dengan boedjoekan dan andjoerannja itoe prempoean hina, Sam So. Ja, nasi soeda mendjadi boeboer, apalah maoe dibilang, melaenken dirikoe bakal tiada terloepoet boeat menanggoeng maloe!”

„Ach,” katanja Bwe Tjhajj-Thajj dengan mengela napas, „memang soeda pasti bahoea

ini semoea ada perboeatan boesoek dari Kang Sam So! Aken tetapi, boeat ini soeal masih boleh traoesa dipikirin doeloe, tjoemalah tentang halnja Tjoei Pan Hong jang sesoedanja membri pandjeran, tapi tiada bakal perolehken istri, biarpoen ada beroer-roesan terhadep familie sendiri, toch tra-oeroeng dia tentoe dateng bikin onar djoega ka sini. Soenggoe inilah ada satoe soeal jang soeker bisa diberesken."

"Sebaliknja," kata Thajj Koen, „masi moe-djoer jang sekarang soeda ada Swat Keng jang eiloc dan pinter, lagipoen belon mempoenjai djodo, maka akoe pikir hendak min-ta Seng Lie boeat wakil menika. Ketahoei-lah Tjoei Pan Hong poen ada teritoeng satoe anak sekolah jang tjakep dan pinter, hingga mendjadi satoe pasangan jang amat sembabat dengen Swat Keng. Djikaloe Kho-nio bisa setoedjoe, besok akoe aken oendang entji bersama - sama Pan Hong dateng kemari, agar marika lebi doeloe bisa djoempaken Seng Lie, sebaliknja Kho-nio sendiri poen dapet saksiken romannja Pan Hong. Kemoedian akoe harep kedoea fihak nanti bisa saling penoedjoe serta soeka djadiken ini perdjodoan. Tetapi, setaoelan begimana Kho-nio ampoenja pendapetan?"

Bwe Thaij-thaij djadi berpikir, bahoe ia sekarang lagi berada dalem keadaän begini roepa, tiada mempoenjai apa-apa boeat bisa kawinken poetrinja, terlebi poela aken mengharep bisa perolehken mantoe jang baek. Oentoeng bener kapan ini perdjodoan sebegimana Thaij Koen hendak atoer sampe bisa kedjadian, oleh kerna boekan sadja Tjoei Pan Hong ada teritoeng satoe Sioe Tjaij dan toeroenan orang berpangkat, malahan ia djoega bakal traoesa repot dalem hal mengadaken ini - itoe boeat pernikahan anaknya.

„Tjoba sadja liat besok,” kemoedian Bwe Thaij-thaij membri penjaoetan, „kaloe keadaän memang mengidzinken, baroelah kita-orang berdame poela lebi djaoe.”

„Itoepoen tiada kliroe,” berkata Thaij Koen, „tetapi akoe harep Kho-nio tiada kesoesoe tjeritaken ini hal pada Swat Keng, kerna koeatir besok dia tiada maoe keloeär bertemoe sebab maloe.”

Bwe Thaij-thaij memanggoet, samentara Thaij Koen telah kaokin boedak-boedakanja prempoean, kemoedian prenta marika itoe aken sigra pergi bikin bersi itoe loteng Siauw Hoen Kok boeat tempat kediamannja Bwe Kho-nio dengen poetrinja.

Boedak-boedak terseboet poen sigra pada berlaloe aken mengerdjaken sebegimana soeda diprenta.

Dalem begitoe, Swat Keng jang sedari tadi ada pergi djalan - djalan di sekiterja ini gedong, telah balik kombali di tempat mana iapoenja iboe bersama Thajj Koen ada berdoedoek, sedeng romannja masi sa-dja keliatan mengoendjoek seperti roepa orang berdoeka dan tiada bergenembira. Meliat demikian, Thajj Koen diam-diam merasa bersoekoer dalem hatinja, sebab dapet mengetahcei ini gadis ternjata ada satoe gadis berbakti, jang selaloe bisa memikirin nasib dirinja serta kesoesahan orang toeanja.

Kemoedian setelah berdoedoek lagi seke-an lama, Thajj Koen laloe masoek ka dalem boeat menoelis sepoetjoek soerat aken disampeken pada sang entji; dalem soeratnja ia toetoerken satoe persatoe tentang ming-gatnja Jan Giok, ia minta itoe entji soeka pandeng adanja sangkoetan familie dan maoe trima Swat Keng sebagai mantoenja aken ganti Jan Giok, enz. enz.

Sehabisnja menoelis dan masoekin soerat itoe dalem envelop dengen betoel, Thajj Koen lantas prenta satoe orangnja jang bo-

leh dipertjaja aken anterin soerat terseboet ka familie Tjoei, dengen dipesen poma-poma soepaja serahken di tangannja Tjoei Thaiij-Thaiij sendiri.

Orang jang diprenta zonder berajal lagi poen sigra berdjalan pergi, sedeng tempo ia sampe pada tempat jang ditoedjoeken, djoestroe Tjoei Pan Hong ada sedeng berdoe-doek omong-omong sama iboenja di roeanan blakang. Tempo itoe soerat diantarken di hadepannja, Tjoei Hoedjin kenalin betoel itoe ada toelisannja Thaiij Koen sendiri, maka sigra ia boeka dan batja, mendadak aer-moekanja di saat mana oendjoekin satoe perobahan, serta serahken pada sang poetra boeat dibatja.

Apabila soeda membatja habis, Pan Hong djadi menarik napas dan berkata dengen roepa berdoeka :

„Sebetoelnja heran sekali, malem boeta Piauw Moaij soeda tinggal minggat dari roemanja, toch anak merasa dengen berdjoedoan sama anak, tiadalah terlaloe membikin ketjiwa atawa membikin Piauw Moaij djadi terhina ?”

„Dan kaoepoenja Ie itoe jalah ada adekoe sendiri,” berkata Tjoei Hoedjin, „djikaloe moesti bikin riboet ini perkara, tentoelah

kedoea fihak aken sama-sama dapet maloe. Soekoer sekarang soeda ada gadis dari familié Bwe jang maoe gantiin menika, biarlah besok kita bersama-sama pergi ka sana boeat tjoba liat, seande bener Bwe Swat Keng ada poenja sedikit ketjantikan, baroelah ini perdamean didjadiken."

„Baeklah." djawab Pan Hong kemoedian, „anak nanti aken menoeroet sadja Boetjin ampoenja pertimbangan."

Tjoei Hoedjin baroe bisa merasa seneng setelah mendenger penjaoetannja sang poetra, laloe bersedia boeat besok koendjoengin gedong Kok Thio aken meliat si bakal nona mantoe. Sedeng pada orang soeroean dari Thaij Koen telah disoeroe poelang boeat bri taoe pada njonjanja tentang kedatengan marika di hari besok.

(Aken disamboeng).